

**ЎЗБЕКИСТОН РЕСПУБЛИКАСИ ОЛИЙ ВА ЎРТА МАХСУС  
ТАЪЛИМ ВАЗИРЛИГИ**

**НИЗОМИЙ НОМИДАГИ ТОШКЕНТ ДАВЛАТ  
ПЕДОГОГИКА УНИВЕРСИТЕТИ**

**Ў. ШАРИПОВА**

**ЮМУШ ФЕЪЛЛАРИНИНГ  
МАЪНО ВАЛЕНТЛИКЛАРИ**

**(Ўқув кўлланма)**

**ТОШКЕНТ - 2012**

Мазкур ўқув кўлланма Тилшунослик фанининг Семасиология бўлимига багишланган. Унда валентлик назарияси, феъл валентликлари ва уларнинг ифодаловчилари хақида маълумотлар берилган. Ҳар бир валентликнинг имкониятлари мисоллар ва далиллар билан ёритиб берилган. Валентлик назариясининг Грамматика, Матншунослик ва Семантика бўлимларининг ўзаро структурал боғланишига таъсири борлиги кўрсатилган.

Ушбу ўқув кўлланмадан филология факултети магистрантлари, талабалари ва мутахассислари фойдаланишлари мумкин.

*Масъул муҳаррир: М.Миртоҷиев – ф.ф.д. проф.;*

*Тақризчилар: Р.Расулов – ф.ф.д. проф.;  
С.Муҳамедова – ф.ф.д. проф.*

## СҮЗ БОШИ

Ўтган асрнинг иккинчи ярмидан бошлаб сўз маъносини тадқиқ этиш тилшуносликнинг дикқат марказига ўтди. Айниқса, 60-йиллардан кейин кенг доирада тадқиқ этила бошланди. Бу сўз валентлигини ўрганишни ҳам юзага келтирди. Сўз валентлиги, бизга маълумки, сўз маъносининг таркиби билан узвий боғлиқдир. Сўз гапда кўлланган маъноси қандай таркибга эга бўлса, шунга мутаносиб равишда ўз валентлиги билан юзага чиқсан бўлади. Шунинг учун ҳам Э.М.Медникова сўзининг маъно таркиби бирламчими ёки унинг валентлиги бирламчими, деган масалани илгари суриб, бу баҳс гўё олдин нима бўлған, товуқми ё тухум, деган баҳсга ўхшайди, деб кўрсатади. Олима семасиология сўзининг синтагматик ва парадигматик хусусиятларидан келиб чиқади, бунда сўз маъноси етакчилик қилиши шарт, деган фикрга келади<sup>11</sup>.

Ҳақиқатан, фалсафада қайд этилишича, ҳар қандай жисмнинг хусусияти шу жисм муносабатга киришганида юзага чиқади. Сўзининг нутқ учун танланган маъносига хос мантикий таркиб унда илгаридан бўлади. У алоказа киришгач, бирикмаларда юзага чиқади. Р.А.Будагов ҳам худди шу фикрни илгари сурган.

Ҳар бир сўзининг маъно валентликлари потенциал имконият бўлиб, у фақат нутқда юзага чиқиши мумкин, лекин, албатта, тил қонуниятига тўла мос келади. Ана шу мутаносиблик ва номосликлар олимларни қизиқтиради.

Кўринадики, сўз маъносининг мантикий таркиби бирламчи бўлиб, шу асосда унинг валентлиги шаклланади. Демак, сўз маъносининг мантикий таркиби билан унинг валентлиги ўртасидаги муносабат ҳақидаги фикрлар анча тортишувли бўлиб, у хали давом этмоқда.

Ҳар қандай ҳолда ҳам сўз маъносининг мантикий таркиби ва сўз валентлиги ўзаро жисп боғланган тил фактлариidir. Уларнинг бирини иккинчисисиз тадқиқ этиб бўлмайди. Бунинг устига, сўз валентлиги ўрганилар экан, у бирикмаларни ўрганиш учун ҳам тадқиқотчига калит беради. У бу калит воситасида бирикмалар сирининг мазмун билан боғлиқ томонини очиш имкониятига эришади.

Машхур немис тилшуноси Г.Хельбиг: “Синтактик валентлик қолипи (асосан феълларда) ҳам синтактик, ҳам семантик куршовни белгилайди, лекин кейингиси факат умумий маъно белгилари (аникроғи архисема) ёрдамида аниқланади”, деган эди ўз вақтида.<sup>23</sup>

Феъл валентлигини тадқиқ этиш гап қолипларини белгилаб чиқиши учун асос беради. Гап қолипларини белгилаш эса ҳозирги машина таржимасини яратиш учун қилинаётган ҳаракат даврида катта аҳамиятта эга.

Юмуш феъллари валентлигини тадқиқ этиш анча кенг доирани ўз ичига олади. У агенсдан ташқари контрагент, объект, пациент, восита каби зарурий валентликларга ҳам эга. Бу деган сўз ушбу феъллар иштирокида тузилган гап бир қатор бўлаклардан таркиб топади. Шу феъл валентлигини тадқиқ этиш ушбу бўлаклар билан уларнинг семантикаси ўртасидаги алоқаларни аниқлашдир. Бу орқали мазмуний синтаксис учун салмоқли ҳисса қўшилади.

Ўзбек тилшуноси С.Усмонов таъкидлаганидек, “Тил нутқ сифатида намоён бўлгандагина маълум функцияни бажариши мумкин”<sup>25</sup>. Бунда турган гапки, сўзларнинг нутқда қўлланиши, сўзлар имконияти ва хусусиятларининг юзага чиқиши эътиборда тутилади. Сўзлар грамматик қолип тақазо этган ҳар қандай сўзни эмас, балки унинг маъноси талаб қилган сўзларнигина қабул қиласди. Яъни у шу томонларни ҳисобга олган ҳолда сўзларни сайлаб олиб, алоқага киришади. Сўзлардаги бу хусусият жуда илгаридан бошлаб хис қилинган. Масалан, М.Кошғарийнинг “Девону луготит турк” ва Замахшарийнинг “Муқаддиматул-адаб” лугатларига ҳам эътибор бериш мумкин. Уларда маълум сўз тушунтирилмоқчи бўлинар экан, иккинчи тилдаги нусхаси аниқ чиқмаса, шу сўзнинг маъносини очиш мақсадида бирикмалари келтирилади. Бу бирикмалар ўша сўз маъносининг мантикий қисмларини очишида роль ўйнайди. Лугатчиликдаги бу анъана дунё лугатчилигининг ҳозирги даврида ҳам ўз қимматини йўқотган эмас. Ҳозир ҳам давом этиб келмоқда. Шунинг учун ҳам В.Виноградов ўзининг лингвистикага бағишлиланган асарларида сўзлар боғланишига оид кўп қимматли фикрларни айтиб ўтган.

Кейинги вақтда сўзларнинг ўз маъно хусусиятига кўра сайлаш усули билан бошқа сўз билан муносабатга киришуви сирини дифференциал семантик усул бўйича асослаб берилди. Бунда ўзаро боғланиб келувчи сўзлар ўз маъноларининг мантикий узвларидан

бири асосида айнан мос келади, деб кўрсатилади. Бундай маъно узвлари классема атамаси билан берилган.

В.Г.Гак эса уни синтагмема атамаси билан қайд этади<sup>4</sup>. Масалан, “стулда ўтирибди” бирикмасида стул сўзи ‘мебель’ ‘суюнчикли’ ‘сатҳ’ ўтиromoқ сўзи эса тик ‘қад билан’ ‘сатҳда’ ‘жойлашмоқ’ семаларидан таркиб топган. Уларнинг ‘сатҳ’ семаси бир хил. Шунга кўра мазкур бирикма тузилган. Шу бир хил сема классема ҳисобланади. Кўринадики, сўзлар маълум сўз билан бирикар экан, ўз маъносининг мантикий узвларидан бири билан бир хил бўлган узвли маънога эга сўзни танлаган бўлади. Худди шу фикр ўзбек тилшунослигида ҳам такорланган бўлиб, уни Ш.Раҳматуллаев ва Р.Юнусовларнинг ҳамкорликда эълон қилган мақолларида кўриш мумкин. Бу мақола классема ҳақидаги илк тадқиқотларданdir<sup>19</sup>.

В.Каримжонова эса шу масалага асосланиб, бир қатор мақолалар эълон қилди. Буларда кўпроқ ўрин келишикли феъл бошқарувидаги бирикмалар маъноси ва классемаси таҳлил қилиб берилади. Мазкур муаллиф юқоридагилардан фарқли равишда, бирикма классемаси бирикманинг ҳоким компоненти бўлган феълнинг қайси валентлигига асосланишини кўрсатади<sup>5</sup>.

Аслини олганда, сўзнинг ўз маъноси имкониятидан келиб чиқиб, бошқа сўзни бирикма учун танлаш имконияти унинг валентлиги ҳисобланади. Бу барча тилшуносликларда қайд этилган. Валентлик термини дастлаб француз тилшуноси Л.Тенъер томонидан қўлланилган бўлиб, бунда у химиядаги шу терминнинг қўлланиш моҳиятидан келиб чиқсан эди. Тенъер сўз валентлигини маъносига кўра таснифлар орқали эмас, рақамлар билан кўрсатиш орқали берган. Масалан, бажарувчини I-рим рақамида, объектни II-рим рақамида ва ҳоказо ҳолда қайд этиб кўрсатади. Шундан кейин валентлик ҳақида тадқиқотлар кенг ёйлади. Айниқса, немис тилшунослигида унга катта эътибор билан қаралди. Бунда валентлик сўз маъноси билан боғлиқ эканлиги дикқат эътиборда туради. Бу масала тезлик билан рус тилшунослигида, кетма-кет ўзбек тилшунослигида ҳам кириб келди. Ўзбек тилшунослигида маълум маъно майдонидаги феъллар олинниб, уларнинг валентлиги таҳлил этилди. Бу соҳада, айниқса, И.Қўчқортөев ва Р.Расуловларнинг докторлик диссертацияларини кўрсатиш мумкин.

И.Қўчқортөевнинг докторлик диссертациясида нутқ феъллари танланиб, бу феъллар маъноларининг оралиқ узвларига кўра тасниф қилинади. Кейин алоҳида бобда уларнинг валентликлари

тадқик этилади. Валентликлар тадқики аввалги бобдаги таснифға асосланган ҳолда олиб борилган. Равшан Расуловнинг докторлик диссертациясида ҳолат феъллари олиниб, ишнинг кириш қисмida шу феъллар маъносининг асосий узви бўйича характерлаб берилиб, кейин оралиқ узвлари бўйича тасниф қилинган. Ниҳоят, фарқланувчи узвлари нимадан иборат бўлиши кўрсатилган<sup>16</sup>.

Ишнинг асосий қисмida ҳолат феъллари валентлиги тадқик этилар экан, шу валентликлар ҳолат феъллари маъноларининг таҳлил этилган узвларига асосланганлиги ҳам назарий, ҳам амалий жиҳатдан исботлаб берилади. Шу орқали тадқиқотчи Г.Хельбиг томонидан илгари сурилган сўз маъноси узвлари асосида валентлик, валентлик асосида гап қолили юзага келиши ҳақидаги фикрни қувватлайди. Шу асосда яна Т.Мусаевнинг сезги феълларининг валентлиги ҳақидаги номзодлик диссертацияси юзага келди.

Қўринадики, валентликларнинг тадқик этилиши дунё тилшунослигида ҳам, асосан, феъллар доирасида бўлган. Чунки феъл, деярли гапнинг кесими вазифасида келади. Ўзбек тилшунослигида валентликни тадқик этиш феъл доирасидан четга чиқди. К.Ҳакимов “Содда гап қолипли фразеологизмларнинг зарурый валентлиги” мавзусида иш олиб борди<sup>29</sup>. Бунда у валентликнинг яна бир ўзига хос хусусиятини очиб берган. Содда гап қолипли фразеологизм валентлигини унинг таркибидаги феъл ёки етакчи бўлак белгилайди. Бу феъл ёки етакчи бўлакнинг валентлиги фразеологизмнинг бошقا бўлаклари томонидан ёпилган бўлса, фразеологизм бу валентлик билан қайта реализация қилиниши мумкин эмас. У ҳолда ўзига мос бўлмаган бирор бўлакда юзага чиқиши мумкин. Қўринадики, гап қолипли кесим вазифасидаги феъл валентлигига, феъл валентлиги ўз маъносининг узвларига ҳар қандай ҳолатда ҳам қатъий боғлик бўлади. Юқорида сўзнинг ташки валентлиги ҳақида фикр юритдик. Унинг ички валентлиги ҳам мавжуд. У шундан иборатки, сўзнинг ўзаги асосида янги сўз ясалар экан, ясовчи қўшимчаларнинг қўшилиши шу ўзакнинг имкониятидан келиб чиқади. Бу имконият ўша сўзнинг ички валентлиги ҳисобланади. Шунингдек, қўшма сўз ясалishi ҳам сўзлардаги шу имконият билан боғлик ҳолда юзага чиқади. Бу ҳақда эса ўзбек тилшунослигида М.Жўрабоеванинг ишларини мисол келтиришимиз мумкин.

Сўз валентлигини тадқик этиш ўзбек тилшунослигига анча кенг тарқалган. У ўзининг бир қатор тадқиқотчилари га ҳам эга бўлиб олган. Мазкур иш ҳам шу тадқиқотчилар ишининг давоми ҳисобланади. Биз уч гурухга ажратилган ҳаракат феълларидан бирини танлаб, шу феъллар устида тадқиқот ишларини олиб борганимиз. Ҳаракат феъллари қўйидаги гуруҳларга бўлинади:

1. Йўлланма ҳаракат феъллари.
2. Юмуш феъллари.
3. Кечим феъллари.

Ушбу иш юмуш феълларининг семантик валентлигига багишиланган. Юмуш феъллари бирор бир фаолиятни ифодаловчи иш-ҳаракатни билдиради. Бунда ҳаракат иш жараённида бирор бир нарсага ўтади ва шу нарсада ўзгариш содир этади. Юмуш феъллари ўзининг маъно тузилиши билан бошқа феъллардан фарқ қиласади. Бунда бажарувчи, бажарувчига кўмаклашувчи, иш бажарилиши обьекти кабилардан ташқари сўз маъноси таркибида яна иш бажариш воситасини билдирувчи курол ифодаси ва феълларнинг кўпинча каузативли бўлиши характерлидир. Шунга кўра бошқа валентликларнинг ҳам реаллашишида хосланишлар юзага келган. Шу хосланишларни очиб бериш, тадқик этиш ишда асосий дикқат марказини эгаллайди.

Юмуш феъллари қўйидаги семантик валентликларга эга:

1. Агенс.
2. Контрагент.
3. Объект.
4. Пациенс.
5. Восита-қурол.
6. Адресат.
7. Ўрин.

## **ЮМУШ ФЕЛЬЛАРИНИНГ АГЕНС ВАЛЕНТЛИГИ ВА УНИНГ ИФОДАЛАНИШИ**

Юмуш феълларининг семантик валентиклари ҳақида гап борар экан, аввало, агенс валентлиги хусусиятлари билан танишиб чиқамиз. Юмуш феълларининг агенси гапда асосан эга вазифасида келади. Юмуш феълларининг семантик курилиши таъсирида агенси доим шахс ифодаловчи сўз бўлади.

Юмуш феълларининг маъно таркибини тузсак, уларнинг ҳаммасига “онг эгаси томонидан” узви ҳос бўлади. Бошқачароқ айтганда, юмуш феъллари билдирган иш-ҳаракат “онг эгаси томонидан”, яъни инсонлар томонидан амалга оширилади. Шунинг учун юмуш феълларининг бажарувчиси доим шахс билдирувчи сўзлар бўлади. Баъзи ҳолларда агенс шахс билдирмайди, лекин онгли ҳаракат англишилиб туради. Масалан, **комбайн ўрди**. Ўрмоқ феъли билдирган ҳаракат онгли равишда бажариладиган иш. **Комбайн** ўзича шу ҳаракатни бажармайди. Уни одам бошқаради, кейин комбайн ўради. Демак, барибир бажарувчи одам бўлиб қолади.

Шу ўринда юмуш феълларини ҳолат феъллари билан қиёслайлик. Ҳолат феълларида умуман ҳаракат йўқ. Ҳолат феъллари билдирган жараён одамларгагина ҳос эмас. Уларда агенс турли предметлар, жониворлар ва шахс бўлиши мумкин. Масалан, **арава турибди, мушук ухлади, девор қулади** каби.

Агенс факат шахсни билдирад экан, у турли маънодаги сўзлар бўлиши мумкин. Бу жиҳатдан уларни қуйидаги гуруҳларга ажратамиз:

1. Агенс вазифасидаги сўзлар шахс билдирувчи атоқли отлар бўлиб, улар яна қуйидаги маъноларни билдиради:

1) исм билдирувчи атоқли отлар бўлади. Масалан, **Холпош** хола бир зумда дастурхон ёзди. (**Ў.Хошимов**). Норқўзи машинага ўғит ортди (**Х.Ғулом**)... Сиддиқжон анҳорнинг нариги ёғида анжир очаётган бўлиб.. (**А.Қаҳҳор**). Бу гаплардаги ёзмоқ, ортмоқ, очмоқ феълларининг агенси сифатида **Холпош** хола **Норқўзи** ва **Сиддиқжон** атоқли отлари келган.

2) одамлар лақабини билдирувчи атоқли отлар бўлади. Масалан, **Тақа мўйлов** эса уй ичидаги майдага мих билан деворга сим қоқа бошлади (**Ў.Умарбеков**). Илҳомча ховуз бўйига палос ташлаб, гўшт пиёз тўғради (**Х.Ғулом**). Биринчи гапда **Тақа мўйлов** сўзи йигит

белгисининг лақаб тариқасида ифодаланишидир, иккинчи гапда эса **Илҳомча-кичиклик маъноси қўшилган ном** гапнинг агенсидир.

3) халқ мифологиясига биноан айрим образни билдирувчи отлар бўлади. Масалан, Афанди ёнғокни пичоқ билан икки бўлди (Латифалар).

2. Агенс қариндош-уругчилик номларини билдиради. Масалан, Дадам икки-уч йилдан буён чўлда бульдозер ҳайдаб ер текислайди (Х.Тўхтабоев). Ойим бўлса уйимиздан уч юз метр наридаги фермада сигир соғади (Х.Тўхтабоев). Самандаровнинг хотини вайсаб юриб чой қўйди (А.Қахҳор). Бу гаплардаги агенс дадам, ойим, хотини сўзлари бўлиб, улар эгалик қўшимчалари билан келган.

3. Агенс шахс билдирувчи турдош отлар билан ифодаланади. Масалан, Кишилар масжид, мадраса солгандা, биз бир етим боқсан арзимайдими (А.Қодирий)... одамлар намат устига ёйилган кумларни қоқиб тушира бошладилар (М.Осим). Шўх қизларимиз гўнг ташийди (Х.Фулом). Бу гаплардаги агенс вазифасида **кишилар, одамлар, қизлар сўзлари** келган.

Ўзбек тилида аввал эга, кейин кесим келади. Баъзан гапнинг модал маъносига кўра ёки поэтик талабга кўра булар ўрин алмашинади. Масалан, кийимини ҳам ёқадими киши (Латифалар). Бу гапда инкор модал маъносига кўра эга ва кесим ўрин алмашган ва "киши кийимини ёқмайди" деган маъно шундай чиройли ифодаланган. Ана шу киши сўзи бу гапнинг агенсидир.

4. Юмуш феълларининг агенси касб билдирувчи номлар билан ифодаланади. Масалан: Йигирма бир ёшга кирган ёш олим кутри (диаметри) етти газ келадиган катта глобус ясади (М.Осим). Беруний қасрга яқинлашганда туғ кўтариб қиличларини қинларидан сугуриб овозлари борича бакириб сўкинаётган аскарбошиларни кўрди. (М.Осим). Гуломбаччанинг амрига бўйсунган усталар кўргонни худди у айтгандай ва ундан ҳам зиёдрок қилиб тайёрладилар (Ўзбек халқ эрт). Бу гаплардаги **олим, усталар, аскарбошилар** сўзлари агенс вазифасидаги сўзлардир.

5. Юмуш феълларининг агенси вазифасида олмошлар бўлиши мумкин. Бунда улар кишилик олмошлари, ўзлик олмоши ёки ким сўроқ олмоши бўлиб, турли шахс-сонда келади. Масалан: Гўнг билан чиқиндиларни мен катта челякка солиб турдим (Х.Тўхтабоев). Сен урушдан ҳассани шу ниятда кўтариб келувдингми? (А.Қахҳор). У кир осадиган арқон билан маҳкам ўраб

ташлади (Ў.Умарбеков). Улар станцияга аравалар извошлиарда катта-катта чамадонлар, қоплар, кўрина ёстикларгача ортиб келишиди. (Х.Ғулом). Юқоридаги мисолларда кишилик олмошлари агенс вазифасида келган. Сигирларни ким соғади? (Х.Тўхтабоев). Бу гапда ким сўроқ олмоши соғмоқ феълининг агенси вазифасида келган. Шу жой жуда зарур бўлса, кунлар юришиб кетганда, ўзимиз омоч билан чопиб оламиз (Ў.Умарбеков). Бу гапда агенс вазифасидаги сўз ўзимиз бўлиб, аслида биз ўзимиз маъносида шахсни ифодалайди.

6.Юмуш феълларининг агенси вазифасида отлашган сўзлар ҳам келади. Улар сифатдош, сифат ёки сон туркумларига оид бўлиб, маъносидан шахс англашиб туради: Иккови сўрига ўтириб, кўсак чувийди (А.Қахҳор). Муштумзўлар мол-мулкини яшираётганини, от-уловини сўяётганини айтди (А.Қахҳор). Баъзи жойларга тўрт - беш мартараб чигит экишди азаматлар (Ў.Усмонов). Биринчи гапда жамловчи сон икков чувимоқ феълининг агенси вазифасида келган. У шахсни англатади. Кейин гапларда отлашган сифат, яъни муштумзўр ва азамат сўзлари сўймоқ ва экмоқ феълларининг агенси вазифасида келган.

7. Юмуш феълларининг агенси вазифасидаги сўз бир нечта мисолда шахс ифодаламайди. Бу гапларда агенс вазифасидаги сўзлар чўл, трактор ва тепловоз бўлиб, улар куйидагича изоҳланади. Масалан: Чўл баҳор келинчаги оёғи остига безалган яшил поёндозини ёйиб ташлади. (М.Осим). Бу гапда ёймоқ феълининг агенси вазифасида чўл сўзи келган. Фикрни образли ифодалаш мақсадида автор жонсиз предметни, яъни чўлни жонлантириб тасвирлаган. Демак, феълнинг асосий семаси “ижро” бу гапда ҳам сакланиб қолган, фақат аллегорик образ-чўл унинг агенси бўлиб келган. Бундай ҳолни биз ҳар қандай аллегорик образлар берилган эртакларда ҳам учратишимииз мумкин. Маслан, Шайтон ўроқ билан пояни ўриб олди (ўзбек халқ эртаги). Тулки бўрининг олдига дастурхон солди (Ўзбек халқ эртаги). Бу гапларда шайтон ва тулки сўзлари шахс хусусиятлари кўчирилган аллегорик образлар бўлиб, ўрмоқ ва солмоқ феълларининг агенсидир.

Трактор бир ярим кун ишлаб тизза бўйи ҳайдаб берибди (А.Қахҳор). Тепловоз сўнгти марта қичқириб составни тортиб кетди (Х.Ғулом). Қўриб турибсизки, юмуш феълларининг агенси транспортни билдирувчи сўзлар бўлиши ҳам мумкин. Бироқ

мантиқан қараганимизда транспорт воситаси ёки техника ўз-ўзидан иш бажармайды. Уни инсон иш бажаришга киришиди. Инсоннинг онгли ҳаракати ва бошқаруви ёрдамида техника воситаси ишни амалга оширади.

Демак, бу гаплардаги трактор ва тешловоз сўзлари ҳайдамоқ ва тортмоқ феълларининг агенси вазифасида қўлланган.

8. Агенс қурилмадан иборат бўлиши ҳам мумкин. Бунда агенс вазифасидаги қурилма таркибида аниқ шахс билдирувчи от (баъзан атоқли от) ва таъкидлаш мақсадида олмош ёки изоҳловчи сўз бўлади. Масалан: Яхшибой аканинг ўзи сизга чўлдан юз гектар ҳайдаб берарди (Ў.Умарбеков). Бу гапда агенс вазифасидаги қурилма **Яхшибой аканинг ўзи** бўлиб ўзлик олмоши агенсни таъкидлаш мақсадида қўлланган.

Биз ака-укалар сув сепамиз (Ў.Хошимов). Оёғимдаги туфлини Шокир деган битта оғайним тикиб берган (Х.Тұхтабоев). Бу мисолларда ҳам агенс **биз ака-укалар, Шокир деган битта оғайним** қурилмаларидан иборат.

Юқорида кўриб чиқсан мисолларимизнинг ҳаммасида эга эксплицит ифодаланган. Баъзан эга имплицит бўлган мисолларни ҳам учратиш мумкин. Бунда эга гапда ифодаланмаган холда контекстдан англашилиб туради. Шахс билдирувчи сўз маъноси алоқадорликка асосан бошқа сўзга кўчади. Натижада эга шахс билдирувчи сўз бўлмай фақат шу юмуш феъли англатган ишнинг гапдаги бажарувчиси маъносини беради. Отлашган сўзлардагидек унда умуман эганинг тўлиқ маъноси ифода топмайди. Бундай гапларда юмуш феълларининг агенси вазифасидаги сўзлар актуализаторлар бўлиши мумкин. Масалан: Тўқайнинг қамишини район саноат комбинати ўриб кетадиган бўлди (Х.Ғулом). Бу гапдаги ўрмоқ феълининг субъекти – **комбинат ишчилари** хисобланади. Бу ерда алоқадорликка асосан **ишчилар** сўзи тушиб колиб, унинг вазифаси **комбинат** сўзига ўтган. Натижада **комбинат ўрди** кўринишидаги предикатив муносабат пайдо бўлган.

Гапда агенс имплицит бўлар экан, буни биз олмошлар билан рамзий ифодалай оламиз. Бунда контекстдан, яни феълнинг шахс-сонига асосан эганинг ҳам шахс-сонини билиб оламиз:

1. Имплицит холдаги агенс гапларда II шахс бирликда бўлади. Тез учар самолёт ясаётиман (А.Қаҳхор). Ўқитувчилар хонасининг

эшигини очдим (Ү.Хошимов). Бу гаплардаги семантик агенс мен олмоши бўлиб у синтактик шаклланмаган.

2. Имплицит ҳолатдаги агенс гапларда I шахс кўплиқда бўлади. Мана бу михланган ёғочларни кўчириб ташлайлик. (П.Қодиров). Кеча туни билан селхона қазидик (Ҳ.Ғулом). Бу гапларда агенс вазифасида кела олиши мумкин бўлган сўз **биз** олмошидир.

3. Имплицит ҳолдаги агенс гапларда 2 шахс бирликда бўлади. Новдани ёшлиқда эггин эди. (Ў.Умарбеков). Хув кўлга бориб, балиқ овла (М.Ҳазратқулов). Бу гаплардаги агенс вазифасида имплицит **сен** олмоши англашилади. Бундай гаплар ҳамма вақт сұхбатдошга нисбатан айтилади. Шунинг учун агенс **сен** ёки сиз (хурмат маъносида) олмоши билан эмас, ундалма орқали ифодаланади. Масалан,

-Насриддин, эшакни сугориб кел (Латифалар).

-Афанди, шуни бўяб берсангиз (Латифалар).

Биринчи гапда **сен** эшакни сугориб кел, иккинчи гапдан эса сиз бўяб берсангиз деган мазмундаги предикатив муносабат англашилиб туради.

Кейинги гапдаги англашилган II шахс кўплиқдаги сиз олмоши бирликда хурмат маъносини билдиради.

4. Имплицит ҳолатдаги агенс гапларда II шахс кўплиқда бўлади. Қўрқманг пахтангизни экаверасиз (Ў.Усмонов). Ҳайкал ҳам курингиз бамисоли ҳаёл! (А.Орипов). Лой билан минг марта ювсангиз ҳам фойдаси йўқ (Ў.Хошимов). Бу гаплардаги феълнинг шахс сони агенснинг ҳам шахс-сонини кўрсатиб туради. Бу сиз олмошидир.

5. Имплицит ҳолатдаги агенс гапларда III шахс бирликда бўлади. Оёғига чарм кавуш кийиб обрезда бет-кўлини ювди. (П.Қодиров). Ерни вақтида шудгорлади. (Ҳ.Ғулом). Фақат мева билан даволайди (Ў.Умарбеков). Бу гаплардаги предикациядан кўриниб турибдики агенс у олмошидир.

6. Имплицит ҳолатдаги агенс гапларда III шахс кўплиқда бўлади....ер ўчоқлар қазий бошладилар (М.Осим). Сел йўлига ғов ясадилар (Ҳ.Ғулом). Бу гапларда агенс улар олмоши бўлиб у гапдаги предикациядан англашилади.

Биз агенс вазифасидаги сўзларни ўрганиб чиқар эканмиз, юмуш феълларининг семантик хусусиятлари бунда катта роль Ўйнаганини кўрдик. Феълдаги “ижро” семаси туфайли ҳар доим агенс вазифасидаги сўзлар шахс ифодалашини кузатдик.

Юмуш феъллари агентсининг синтактик хусусияти унинг деярли доим эга вазифасида келишидир.

Хуллас, юмуш феъллари соф феъл вазифасида қўлланиб, деярли гапда кесим вазифасида келади. Бунда унинг агенти феъл маъно таркибидаги “ижро” семаси таъсирида ҳар доим шахс билдирувчи сўз бўлади. Агар агент вазифасида шахсни билдирмайдиган сўз келган бўлса, агент:

- 1) аллегорик образ бўлиши мумкин;
- 2) шахс фаолияти кўчирилган техника восита бўлиши мумкин;
- 3) шахс билдирувчи сўз тушиб қолиб, унинг маъноси кўчган сўз орқали ифодаланиши мумкин.

## ЮМУШ ФЕЛЬИ ТУРЛИ НИСБАТЛАРДА КЕЛГАНДА АГЕНСНИНГ ГАПДАГИ ВАЗИФАСИ

Ўзбек тилидаги мураккаб категориялардан бири – бу нисбат категориясидир. Ўзбек тилидаги нисбат категориясини таърифлашда бошқа тиллардаги нисбат категорияси қонун-коидаларга асосланилган. Бу эса бир мунча чалкашлиқка олиб келган. Нисбат – бу феълнинг субъект ва объект билан муносабатидир. Демак, уни ўзбек тилининг гап қурилмаларини таҳлил қилиб, иччи қонуниятлари асосида кўриб чиқиш керак. Ҳам товуш ўзгариши, ҳам сўз тузилиши ва маъносига эътибор бериш керак бўлади.

Биз ўрганаётган юмуш феъллари турли нисбатларда келишини кўрдик. Бу ҳолларда агенс ифодаловчи сўзларнинг вазифалари ҳам ўзгариади.

1. Юмуш феъллари ўзлик нисбатида келса, ўтимсиз феълга айланади. Яъни феълнинг субъекти (бажарувчиси) билан обьекти (ўтувчиси) ўртасида қўйидаги ҳолатни кузатамиз. Феъл ўзлик нисбатида ўтимсизлашади. Ўрганаётганимиз юмуш феъллари доимо ўтимли бўлиб, уннинг агенс актантини ҳам, обьект актантини ҳам бор. Аммо у ўзлик нисбатида келганда, худди ҳолат феълларига ўхшаб қолади, яъни агенс актантининг ўзи обьект вазифасини ҳам бажаради. Иш ҳаракат бажарувчиси айни пайтда ҳаракатнинг ўтувчиси ҳам бўлиб келади<sup>16</sup>.

Демак, ўтимсиз феъллар билан ўзлик нисбатидаги юмуш феълларининг агенс ва обьекти битта сўзда кесишиади.

Мисоллар: Азиз шунча ўраниб олса ҳам, ётган ўрни исимасди (Ў.Усмонов). Рўпарадаги уйдан яхши кийинган аёллар қўлларида идишлари билан қозон бошига қатнаб турибдилар (П.Турсун). Бу гапларда ўранмоқ ва кийинмоқ феълларининг агенси ҳам, обьекти ҳам битта, биринчи гапда Азиз, иккинчи гапда аёллар сўзларидир. Яъни Азиз ўради, ишни бажарди ўрагани бошқа бир жисм эмас, балки ўзи. Ҳаракат яна Азизга қайтяпти. Ўзлик нисбатининг энг асосий хусусияти ҳам ана шунда.

2. Юмуш феъллари мажхуллик нисбатида келганда, қандай ўзгаришлар содир бўлади? Ўзлик ва мажхуллик нисбатининг қўшимчалари бир хил -н -л. Булардан -н аффикси нокаузатив феълларга қўшилса, ўзлик нисбати, каузатив феълларга қўшилса мажхуллик нисбати ҳосил бўлади<sup>12</sup>. Мажхуллик нисбатидаги феълнинг агенси одатда имплицит бўлиб, уни контекстдан ҳам

англаш қийин. Агар биз уни контекстдан келтириб чиқарсак ҳам, у эга вазифасида бүлмайды, воситали түлдирувчи вазифасида бўлиши мумкин. Мажхул нисбатдаги феъл маъносига эътибор берсак, иш-ҳаракат умуман бажарилганлиги ҳақида маълум қилинади, аммо унинг бажарувчиси мавхум қолади. Масалан, ўзлик нисбатидаги феълнинг шахс-сони англашилиб туради, мажхул нисбатда эса феълнинг шахс-сони номаълум бўлади. Шунинг учун имплицит ҳам дейиш қийин. Чунки агенси имплицит гапларнинг феъли қайси шахс-сонда бўлса, келтириб чиқариб, агентини олмош билан ифодалаш мумкин. Мажхул нисбатдаги феълларнинг агентини топиш мураккаб жараёндир. Масалан: Баъзи ерларга чигит икки мартараб экилди. (Ў.Умарбеков). Бу гаплардаги феъл маълум касбкорга оид ҳаракатни билдиргани туфайли феълнинг маъносидан келиб чиқиб, экиш ҳаракатининг бажарувчиси дәжонлар дейиш мумкин. Бу гап чигит дәжонлар томонидан экилди, шаклида берилиши ва агенс гапда воситали түлдирувчи бўлиши мумкин эди. Гапнинг эгаси эса чигит, яъни объект актантидир.

Яна мисолларга мурожаат қиласиз, Шуларнинг тагига жой тайёрланди. (Ў.Умарбеков) Берунийнинг сўзлари оловга сепилган сувдек таъсир кўрсатади (М.Осим). Уйда нон ёпилмаганидек, бозордан ҳам сотиб олинмас эди (А.Қодирий). Бу гапларда мажхул нисбатдаги тайёрламоқ, сепмоқ, ёпмоқ феълларининг агентини топиш қийин, у жуда мавхумлашиб кетган. Таҳминан ёшлиар томонидан, унинг орқали, Нигор ойимнинг қўли билан тарзида бериш мумкин. Бу гапларда ҳам агенс воситали түлдирувчи вазифасида келади. Гапларнинг эгаси жой, нон бўлиб, улар феълнинг объект ифодаловчилариdir. Иккинчи гапдаги юмуш феъли (сепмоқ) гапда аниқловчи вазифасида келган, шунинг учун гапнинг эгаси унинг валентлик ифодаловчиларидан эмас.

Бир мисолда агенс қўйидагича ўз ифодасини топган... айниқса сенинг қўлинг билан тугилган мантилардан жуда мамнун бўлдим, Раъно! (А.Қодирий). Бу гапда мажхул нисбатдаги тугмоқ феълнинг агенси Раъно гапда ундалма бўлиб қолган. Яна тугиш жараёнининг бажарувчисини билдирган қўлинг билан бирикмаси ҳам берилган. Бу бирикма гапда воситали түлдирувчи вазифасида келган. Фикрни бу кўринишда ифодалаш нутқда жуда кўп учрайди. Ушбу мисол мажхул нисбатдаги феълнинг агенси гапда қандай ифодаланиши мумкинлигини кўрсатади.

3. Юмуш феъллари орттирма нисбатда келса, агенс ифодаловчиси шахс билдирувчи сүз бўлади. Юмуш феълларининг ўзига хос хусусияти – маъносидаги “ижро” семасидан келиб чиқиб айтиш мумкинки, агенс актанти иккиланган шахс – бажарувчи ва бажаришга ундовчидан иборат бўлади. Бажарувчи, иш-ҳаракатни содир этувчи шахс – пациент; бажаришга ундовчи эса шу ишни буюрган, илтимос қилган, йўл қўйган шахс – агенсdir. Баъзан ҳар иккала шахс ҳам гапда реаллашади, баъзан эса йўқ. Кўпинча гапда фақат бажаришга ундовчи – агенс реаллашган бўлиб, гапда эга вазифасида келади. Мисоллар: Ўша ўзи келиб тиллақош ясаттириб кетди (Ў.Умарбеков). Буни Полвонов билиб қолиб арzon-гаровга сотиб олган, одам юбориб ўрдириб келган эди (Ў.Умарбеков). Ҳар ҳафтада бир-икки мартаба қовоқ сомса ёптирмай қўймас эди (А.Қодирий). Бу гапларда орттирма нисбатдаги **ясамоқ**, **ўрмоқ**, **ёпмоқ** феълларининг агенси ўзи, Полвонов сўзлари бўлиб (учинчи мисолда агенс имплицит), гапда эга вазифасида келган ҳаракатга ундовчидир. Иш-ҳаракатни бажарувчи факат бир гапда ўз ифодасини топган, яъни иккинчи гапдаги **одам юбориб** сўз бирикмасига эътибор беринг. Шу одам сўзи иш-ҳаракатни бажарувчи – пациент бўлиб, гапда воситасиз тўлдирувчи вазифасида келган. Бу гапларда агенс, яъни бажаришга ундовчининг 2-планга ўтиши юмуш феълларининг маъно тузилишидан келиб чиқади. Юмуш феълларининг маъно тузилишидаги “ижро” узви иш-ҳаракат бажарилишида бажаришга ундовчидан кўра бажарувчининг фаоллигини оширади. Шунинг учун ҳар бир мисолимизда кечим-натижа биринчи планда бўлиб, сабаб кечими иккинчи планга ўтади, яъни 1-субъект ҳаракатни бажаришга ундовчи бўлиб колади, ҳаракатни эса 2-субъект бажаради. У гапда воситали тўлдирувчи вазифасида келади. Масалан: Мен Найманчани буздириб ташлардим (Ў.Умарбеков). Бу гапда Мен – агенс ифодаловчиси, аммо иш-ҳаракатни бажармайди, факат шу ишни буюради, кимдир уни бажаради. Бу ҳолат орттирма нисбатли феъллардаги дистант-каузация деб аталади.

4. Юмуш феълларининг биргалик нисбатида келиши ҳам кўп учрайди. Биргалик нисбатидаги ўтимли феъллар бисубъектли бўлиб, бири иккинчисига қўмаклашганлик маъносини беради. Ўтимли феълларда бисубъектлилик аввалги ҳодиса бўлиб, полисубъектлилик кейинги келиб чиқсан ҳодиса сифатида қаралиши керак.

Маслан, ... қолган ўлжаларни шогирди билан баробар бўлишди. (Ҳ.Ғулом). Бу гапдаги **бўлишди** феълининг агенси имплицит у маъносида бўлиб гапда эга вазифасида келган. Яна шу гапда **шогирди билан** биримасидаги билан бу ерда қўпроқ боғловчи вазифасида келган. Иш-ҳаракат бажарувчилари шогирда у сўзлари бўлиб, улар иш-ҳаракатни навбатма-навбат бажаришгани, бир-бирига кўмаклашгани англашилиб турибди. Маъна шу маънодан келиб чиқиб, биргаликда бажариш, қўпчилик бажариши маънолари вужудга келган. Эндиликда жуда қўп мисолларда шу – кейинги маънони кўрамиз. Баъзи жойларда тўртбеш марталаб чигит экишди азаматлар (Ў.Усмонов). Қолгалар чўлга кетадиган юкларни аравага ортишди. (Ҳ.Ғулом). Колхознинг бир вагон таҳтаси бор, хар кўрганимда юрагим эзилиб кетади, нотўғри тахлашган. (А.Қаҳҳор). Бу гапларда биргалик нисбатидаги **эмок**, **ортмоқ**, **таҳламоқ** феълларининг агенси **азаматлар**, **қолганлар**, **улар** (имплицит) шахс билдирувчи сўзлар бўлиб, гапда эга вазифасида келган. Демак юмуш феъллари биргалик нисбатида келса, агенс ифодаловчиси икки ва ундан ортиқ шахс маъносини билдиради.

Хуллас, юмуш феъллари биргалик нисбатда келса, агенси эга вазифасида бўлади.

Юмуш феъллари ўзлик нисбатида бўлса, гапда агенс ва обьект битта сўзда кесишади, эга вазифасида келади.

Юмуш феъллари мажхул нисбатда қўлланса, агенс қайд этилмайди ва мантиқан мавхумлигича қолади. Баъзан агенс гапда мавжуд бўлиши мумкин, бунда у воситали тўлдирувчи вазифасида бўлади.

Юмуш феъллари орттирма нисбатда келса феълда икки шахслик юзага келиб, бажаришга ундовчи – агенс ва бажарувчи – пациент мавжуд бўлади. Гапда икки кечимлилик кузатилади. Агенс гапда эга, пациент воситали тўлдирувчи бўлади.

Юмуш феъллари биргалик нисбатда келса, бисубъектлилик бўлади. Хар иккала бажарувчи ҳам бир хил эга вазифасини бажаради.

## ЮМУШ ФЕЛЬЛАРИ ФУНКЦИОНАЛ ФОРМАЛАРДА КЕЛГАНДА АГЕНСНИНГ ГАПДАГИ ВАЗИФАСИ

Юмуш феъллари турли функционал шаклларда келар экан, агенс ифодаловчиларининг вазифаси ҳам ўзгариб кетиши мумкин. У предикатив қўшилмада субъект вазифасида ҳам, шу билан бирга бошқа бирикмалар таркибида бошқа синтактик вазифаларда ҳам келганлиги кузатилади. Феъл сифатдош, равишдош ёки ҳаракат номи шаклларида келганда, агенси ҳеч вақт бир хил синтактик вазифада бўлмайди. Хатто у бир вазифа шаклида бўлса ҳам агенс ифодаловчиси турли синтактик вазифада келиши кузатилади. Шунинг учун ҳам юмуш феълларининг турли вазифа шаклларида келишини алоҳида ва ўз ўрни билан таҳлил этишга тўғри келади:

1. Юмуш феъллари сифатдош шаклида келганда белгини билдиради ва гапда аникловчи вазифасида келади. Агенс ифодаловчиси эса аникланмиш вазифасида бўлади. Аникланмиш вазифасидаги сўз анча эркин бўлиб, гапда эга, тўлдирувчи ёки қаратқич аникловчи бўлиши мумкин. Юмуш феъли бу гапда кесим вазифасида келмайди. Гапдаги предикатиянинг марказида бошқа кесим туради. Биз ўрганаётган сифатдош шаклидаги юмуш феълининг агенси ушбу кесимга нисбатан турлича алоқада бўлиши мумкин.

Агенс ифодаловчисининг гапда эга вазифасида келишини қўриб чиқайлик.

...ер юзини ифлос нарсалардан тозалайдиган одамлар бор (Ў.Хошимов). Бу гап да сифатдош шаклидаги *тозаламоқ* феълининг агенси вазифасида *одамлар* сўзи келган.

Сифатдош шаклида қўрганимиз тозаламоқ феъли белгини билдиради. Шунинг учун унинг маъносидаги “ижро” семаси бир оз орқа планга ўтади. Дарҳақиқат, иш бажарилган, бажарилган ишнинг натижаси белги сифатида берилган.

Сифатловчи-сифатланмиш муносабатидаги сифатланмиш агенс бўлса, у турли вазифаларда келиши мумкин. Маслан, ... ўт юлиб юрган бир боланинг ёнига бориб (Х.Тўхтабоев). Бу гапда *юлмоқ* феълининг агенси *бола* гапда қаратқич аникловчиси вазифасида келган.

Баъзан сифатдош шаклидаги феълларнинг аникловчи-аникланмиш курилмасидаги аникланмиш вазифасида агенс ифо-

даловчисини эмас, объектни учратамиз. Маслан: Биз шунча йилдан бери ҳаракат қилиб курган посёлкамиз битди. (Ү.Умарбеков). Мен түккан мантилар қалай экан (А.Қодирий). Ҳудди Ҳафиза тайёрлайдиган мантиларнинг ўзи (Ү.Умарбеков). Бу гапларда *курган*, *түккан*, *тайёрлайдиган* каби сифатдошлар аникловчи вазифасида келган бўлиб, уларнинг аникланмиши вазифасидаги *посёлкамиз*, *мантилар*, *манти* сўзлари одатдагидек агенс эмас, объект ифодаловчиларидир. Сифатдош шаклидаги юмуш феъллари эса ёйик аникловчи ҳолида иккиласми предикациянинг предикати вазифасида келган. Уларнинг агенти ўша иккиласми предикациянинг субъекти *биз*, *мен*, *Ҳафиза* сўзларидир. Бу сўзлар гапнинг эгаси эмас. Биринчи ва иккинчи гапда эга юмуш феълларининг объект ифодаловчилари бўлиб, охирги гапда эга имплицит (кўрсатиш олмоши маъносини беради). Бу гапдаги юмуш феълининг обеъкт ифодаловчиси эса от-кесмнинг қаратқич аникловчиси вазифасида келган.

Сифатдош шаклидаги юмуш феъллари аникловчи вазифасида келар экан, аникланмиш вазифасида объект актанти бўлиши фақат ўтимли феълларгагина хосdir.

Бу кўринишлар нисбий ҳол бўлиб, агар гапнинг маъносига кўра агент гапда юмуш феъли сифатдоши билан аникловчи-аникланмиш қурилмасида келса, уларнинг ўрнини алмаштириш мумкин бўлади, яъни *тозалайдиган одамлар - одамлар тозалайдиган ёки осган Ориф - Ориф осган* каби.

Лекин аникланмиш объект ифодаловчиси бўлса, уларни сира алмаштириб бўлмайди. Бу ҳам ўзига хос тил қонуниятидир. Қиёсланг: *курган посёлкамиз -посёлкамиз курган*.

Юмуш феълларининг мажхул нисбатдаги сифатдоши иштирок этган гапда агент вазифасидаги сўз ўз ифодасини топмайди. Аникловчи-аникланмиш муносабатидаги аникланмиш юмуш феълларининг объект ифодаловчиси бўлади. Масалан: Азиз яқиндагина киртишлаб ўрилган, лекин ҳашаги ҳали йигиб улгурилмаган бедазор уватидан аста-секин пастлаб бораркан (Ү.Усмонов). Берунийнинг сўзлари оловга сепилган сувдек таъсир кўрсатди (М.Осим). Бу гапларда агент имплицит ҳолатда. Аммо мажхул нисбатдаги мисоллардан бирида у гапда ўз ифодасини топган. Бунда у ундалма бўлиб келган атоқли отdir:

...сенинг қўлларинг билан тугилган мантилардан жуда мамнунман, Раъно! (А.Қодирий). Бу гапда *тугилган* сифатдош

шаклидаги феълнинг агенси вазифасида *Раъно* атоқли оти келган. У гапда ундалма сифатида қўлланган.

Агент вазифасидаги сўзлар ҳақида гапирганимизда, улар доимо шахс маъносини билдиришини айтиб ўтган эдик. Аммо баъзан маъно кўчиши ёки образли ифодалаш туфайли агенс вазифасидаги сўз турдош от бўлиши мумкинлигини кўргандик. Шундай ҳол сифатдош формасидаги юмуш феълларида ҳам учради. Масалан, Сизларда ҳалиги эшиқ, ром ясадиган устахоналар ҳам борми? (Х.Тўхтабоев). Бу гапда ясамоқ феълининг агенс ифодоловчиси *устахона* сўзиdir. Бу сўз *усталар устахонаси* сўз бирикмасининг алоқадорликка асосан ихчамлашган шаклиdir.

Сифатдош шаклидаги феъллар баъзан отлашади. Бунда агенс ҳам уларнинг ўзи бўлади. Масалан: Эрта-индин ўлиб кетсан тепкилаб кўмадиганимдан айрилиб қолдим айланай (Ў.Хошимов). Эргашевнинг тобутини кўтаргандар орасида у ҳам бор (Ў.Хошимов). Бахмалбоф маҳалла-духоба тўқийдигандар маҳалласи (А.Қодирий).

Бу гапларда *кўмадиган*, *кўтарган*, *тўқийдиган* сифатдош шаклидаги юмуш феълларининг агенси вазифасидаги сўзлар тушиб қолган, бу сўзларнинг маъноси ҳам уларнинг аниқловчиси (сифатдош шаклидаги юмуш феъллари)га юклangan.

Отлашиш жараёнида сифатдош шаклидаги юмуш феъллари мавхум ҳолатни яна ҳам аниқроғи ҳаракат номини билдириши мумкин. Бундай гапларда агенс ўз ифодасини топган бўлса у қаратқич аниқловчиси вазифасида келади. Масалан: Нигор ойимнинг бир ойсиз кир ювганини кўрса ғавғо соларди (А.Қодирий). ..муштумзўрлар мол-мулкини яширётганини, отувонини сўяётганини айтиб, бу ишни тезроқ ўтказишни талаб қилади (А.Қаҳҳор). Бу гапларда *ювмоқ*, *сўймоқ* феълларининг агенси қаратқич келишигидаги *Нигор ойим* ва *муштумзўрлар* сўзларидир.

2. Равишдош шаклидаги юмуш феълларида агенс ифодалов-чинининг вазифалари ўзгармайди, яъни эга ва кесим курилмасидагидек бўлади. Фақат феъл бу формада ҳол вазифасида келади. Масалан: Энди сизларга ҳеч ким тош отиб шоҳингизни синдирмайди, танангизга мих қоқиб озор бермайди! (Х.Тўхтабоев). Ҳар ҳафтада бир икки мартаба қовоқ сомса ёпдирмай қолмас эди (А.Қодирий). Афанди қаҳратон қиши куни ўтин тергани чиққан эди (Латифалар). Бу гапларда *қоқмоқ*, *ёпмоқ*, *термоқ* феълларининг

агенси вазифасида *ҳеч ким*, *Афанди* сўзлари келган. Иккинчи гапда эга имплицит. Кесимнинг шахс-сонига қўра агенс ифодаловчиси у олмоши маъносини англатади. Ҳар учала ҳолда ҳам агенс эга вазифасида келган.

3. Ҳаракат номи шаклидаги юмуш феъллари гапда турли вазифаларда келади. Шунга яраша унинг агенси вазифасидаги сўз ҳам турлича ифода топиши мумкин:

1) юмуш феъли ҳаракат номи шаклидаги кесим вазифасида келса, унинг агенси бўлмайди. Бунда шахси топилмайдиган гап тузилиши кузатилади.

Маъносига эътибор берсак, потенциал агенс вазифасида шахс билдирувчи сўз бўлиши мумкинлиги англашилиб туради. Маслан: Эчки боқиш керак (Ў.Умарбеков). Кейинчалик ёнига кичкина бир консерва заводи қуриш мумкин (Ў.Умарбеков). Селхона қазиш керак (Х.Ғулом).

2) ҳаракат номининг эга вазифасида келиши билан отлашиш жараёни янада аниқ намоён бўлади. Бунда агенс умуман кўринмайди. Чунки феъл маълум бир ҳаракат кечими сифатида эмас, ўша кечимнинг номи сифатида реаллашади. Шунинг учун унинг бажарувчиси ҳатто имплицит ҳолатда ҳам англашилмайди. Бунда кимдир томонидан бажариш эмас, умуман ўша бажариш жарабининг номи англашилиб туради. Маслан: Соатни бураш эсимдан чиқмайди (А.Қаҳҳор). Ҳовлини супуриш, идиштоворқларни ювиш ўшанинг бўйнида (Ў.Хошимов).

Демак, ҳаракат номи формасидаги юмуш феъллари эга ёки кесим вазифасида келса, агенс вазифасидаги сўз бўлмайди. Бу ушбу сўзларнинг отлашган маъно узвларидан ҳам маълум. Йиғилган мисоллар ҳам шу фикримизни тасдиқлайди.

3) ҳаракат номи формасидаги юмуш феъллари тўлдирувчи вазифасида келса, агенс вазифасидаги сўз эга бўлиши кузатилади. Бу феълларнинг тўлдирувчи вазифасида маъно ҳаракатчанлиги ошишини кўрсатади. Кўсак чувишга сиз устасиз-ку! (А.Қаҳҳор). Норқўзи ер чопиб, гўнгни текислаш билан овора (Х.Ғулом). Ёш ҳаким кечгача малҳам суртиш билан овора бўлди (М.Осим). Бу гапларда *чувимок*, *текисламок*, *суртмоқ* феълларининг агенс ифодоловчилари *сиз*, *Норқўзи*, ҳаким сўзларидир. Улар гапда эга вазифасида келган. Ҳаракат номи шаклидаги юмуш феълларининг бажарувчинини юзага чиқариш учун ҳаракат номига жўналиш

келишиги қўшимчасини қўшиш ёки билан кўмакчисини қўллаш керак бўлади.

Юмуш феъллари феъл шаклларида қўлланганда агенс ифодаловчиларининг вазифаси ҳам, ифодаланиши ҳам ўзгариб кетишини мисолларда кўрдик.

Юмуш феъллари сифатдош шаклида бўлса, гапда аниқловчи вазифасини бажаради. Унинг агенси аниқловчи-аниқланмиш қурилмасидаги аниқланмиш сифатида гапда эга, тўлдирувчи, аниқловчи каби вазифаларда бўлиши мумкин. Агар аниқловчи-аниқланмиш қурилмасидаги аниқланмиш обьект ифодаловчи бўлса, агенс эга вазифасини бажаради. Юмуш феъли мажхул нисбатдаги сифатдош бўлса, унинг агенси номаълум бўлади.

Юмуш феъллари равишдош шаклида бўлса, агенси эга вазифасида келиши кузатилади.

Юмуш феъли ҳаракат номи шаклидаги кесим бўлса, эгаси қайд этилмайди, мантиқан англашилади. Юмуш феъли ҳаракат номи шаклида эга вазифасида бўлса, агенс умуман кўринмайди ва англашилмайди ҳам. Чунки бунда феъл иш-ҳаракат номи шаклида тўлдирувчи вазифасида келса, агенс ифодаловчиси эга бўлади.

## Хулоса

Юмуш феълларининг агенс валентлиги таҳлил этилар экан, куйидаги натижаларга келинди.

1. Юмуш феълларининг агенс валентлиги реаллашар экан, агенс актанти деярли гапнинг эгаси вазифасида қайд этилади. Бунинг учун юмуш феъли соф феъл формасида аниқлик нисбатида, биргалик нисбатида, ўзлик нисбатида ва равишдош вазифаси шаклида келиши керак.

2. Агенс эга вазифасида қўлланиши керак бўлгани ҳолда, нутқда қайд этилмаслиги ҳам мумкин. Бунда у гап мантиқидан англашилиб туради.

3. Юмуш феълининг агенс актанти гапда воситасиз тўлдирувчи вазифасида ҳам келиши мумкин. Бунинг учун феъл сифатдош вазифаси шаклида келиб гапда аниқловчи бўлади. Аниқланмиш вазифасидаги агенс эса гапнинг тўлдирувчиси сифатида қўлланиши мумкин.

4. Юмуш феълининг агенс актанти воситали тўлдирувчи вазифасини бажаради. Бунинг учун феъл мажхул нисбатда келади.

5. Юмуш феълининг агенти актант қаратқич аниқловчиси вазифасида құлланади. Бунинг учун юмуш феъли ҳаракат номи шаклида кели қаратқич келишигидаги агентсинг қаралмиши вазифасида бўлади.

6. Юмуш феълларининг агенти от, сифат, сон, олмош, сифатдош шаклида ифодаланиши мумкин ва улар деярли доим шахсни билдиради. Айрим ҳолларда жониворлар ва турли нарсаларнинг номлари жонлантирилиб шахс маъносида қўлланиши мумкин.

### Контрагент

Ўзбек тилидаги юмуш феълларининг контрагент валентлиги ҳам мавжуд. Апресян феъл валентликларини санаганда, бу валентликка катта эътибор беради. Аммо ўзбек тилидаги юмуш феъллари контрагентининг юзага чиқиши жуда кам кузатилади. Бу валентлик нутқ феълларида анча фаол бўлиб, у И.Кўчқортойев томонидан атрофлича тадқиқ этилган<sup>7</sup>. Контрагент нутқ феълларининг зарурий валентлиги бўлиб у ҳам нутқ фаолиятини юзага келтиради. Аммо контрагентнинг нутки мустакил эмас, агентса жавобан юзага келади. Нутқ жараёнининг ўзи агент билан бирга контрагент ифодаловчисини ҳам талаб қиласи. Аммо юмуш феълларида контрагент у даражада фаол ҳолатда эмас. Биз йикқан мисолларда ҳам у жуда кам учрайди.

Контрагент гапдаги вазифасига кўра восита валентлигига жуда яқин туради. Восита валентлигининг ифодаловчиси феълдан англашилган ҳаракатнинг бажарилишида ёрдамчи буюмни билдиради. Контрагент актант эса ёрдамчи шахсни билдириб феълдан англашилган ҳаракатда иштирок этади. Феълдан англашилган ҳаракатни агент ҳам бажаради ва у асосий бажарувчи ҳисобланади. Контрагент унга кўмакчи, лекин эркин ҳаракат қилувчидир. Масалан: У Чўлбобо билан ишкомда ток очаётган бўлса керак (Х.Фулом). Бу гапдаги очмоқ феълининг контрагент ифодаловчиси Чўлбобо сўзидир. Контрагент ифодаловчиси шахс билдиради. Гапдаги агент у сўзи бўлиб Чўлбобо шу у сўзида ифодаланган шахс қилаётган ишга ҳамкорлик қиласи. Ушбу гапда контрагент ифодоловчиси атоқли от бўлиб, у гапда кесим вазифасини ўтовчи юмуш феълига билан кўмакчиси орқали боғланиб келган. Юмуш феълининг контрагент актант гапда қайд этилар экан, ўз ҳоким бўлаги (феъл) билан ҳамма вакт билан

күмакчиси орқали боғланиб келади. Контрагент ҳамма вақт шахс билдирувчи сўзлардан иборат бўлиб у от, сон, олмош туркумлари орқали ифодаланади. Маслан: Ростини айтсан, шу тобда менинг ҳам ана шу болалар билан эгатларга ёнма-ён тушиб олиб мусобақалашиб кетмон чопгим келди (Х.Тўхтабоев). Қолган ўлжаларни шогирди билан баробар бўлишиди (Х.Ғулом). Бу гапларда *чопмоқ*, *бўлмоқ* юмуш феълларининг контрагент ифодаловчиси *болалар*, *шогирд* сўзларидир.

### Хулоса

1. Юмуш феълларининг контрагенти гапда воситали тўлдирувчи вазифасида келади.
2. Контрагент актанти гапда кесим вазифасида келган юмуш феъли билан ҳамма вақт *билин* күмакчиси орқали боғланади.
3. Юмуш феълининг контрагент актанти нутқда от, сон, олмош туркумларида ифодаланиб фақат шахс маъносини билдириб келади.
4. Юмуш феълининг контрагенти нутқда жуда кам учрайди.

## ЮМУШ ФЕЪЛЛАРИДА ОБЪЕКТ ВАЛЕНТЛИГИ

Юмуш феълларининг барчаси ўтимлидир. Шунинг учун улар объект валентлигига эга бўлади. Ўтимли феъллар семантикаси (маъно тузилиши) тушум келишигидаги ҳаракат ўтувчи предметни ифода этган сўзни тақазо этади. Улар гапда воситасиз тўлдирувчи вазифасида келади.

Объект ифодаловчи сўзлар турли маъноларни ифодалайди. Юмуш феълларида ифодаланган ҳаракат маълум бир “жисмда қисман ёки тўлиқ ўзгариш” “хосил қилиш” дан иборатдир. Бу маъно тузилиши, албатта, объект ифодаловчисида ўз аксини топади.

Юмуш феълларининг объект ифодаловчилари турли маънода бўлиши мумкин ва ҳар хил сўз туркумларига оид бўлади.

Объект ифодаловчи сўзлар ҳаммадан кўп турдош отлар бўлиб, улар куйидаги маъноларни билдиради:

1. Шахсни билдирувчи турдош отлар. Масалан: Филлар ҳартуми билан отлиқларни ўраб олиб ерга урар, босиб ўлдиради (М.Осим). От қиз билан болаларни кўтарганча ҳавога учиб кетди (Ўзб.Х.О.И). Зафар уларга ёр бўлиб душманни орқага сура бошлиди (М.Осим). Бу гапларда *отлиқлар, қиз, бола, душман* сўзлари *ўрамоқ, кўтмармоқ, сурмоқ* феълларининг объект ифодаловчилариdir.

2. Жониворларни билдирувчи турдош отлар. Масалан: Ҳув кўлга бориб, балиқ овла (М.Хазраткулов). Ойим бўлса уйимиздан уч юз метр наридаги фермада сигир соғади (Х.Тўхтабоев). Отларни эгарлайми? (Х.Фулом). Бу гаплардаги *овламоқ, соғмоқ, эгарламоқ* феълларининг объект ифодаловчилари *балиқ, сигир, от* сўзларидир.

3. Жонсиз предметларни билдирувчи турдош отлар. Масалан: Дадам гулдор шойи рўмолни опамга узатди (Ў.Хошимов). Туни билан гўза суғорди (Х.Фулом). Усмоновни кўриб шоғёр йигит кабина чироғини ёқди ва орқа эшикни очиб қўйди (Ў.Умарбеков). Бу гапларда *узатмоқ, сугормоқ, очмоқ* феълларининг объект ифодаловчиси *рўмол, гўза, эшик* сўзларидир. Юмуш феъллари ўз маъносига кўра, албатта, объект валентлигига эга бўлар экан, унинг юзага чиқиши турган гапки бир хил маъно майдонига кирадиган сўзлардан иборат бўлмайди. Бу феъллар маъносининг мантиқий бўлаклари билан объект ифодаловчиларининг маъноси узвий боғлик бўлади. Барча юмуш феълларининг умумлаштирувчи узви

"ижро" бўлар экан, улар объект валентлигини вужудга келтирувчи узвга кўра куйидаги гурухларга бўлинади.

1. *Очмоқ, ёзмоқ, ётмоқ* юмуш феълларининг маъно тузилишини кўриб чиқайлик. *Очмоқ* феълининг маъно тузилишини 'нарсани панадан чиқармоқ' тарзида бериш мумкин. *Ёзмоқ, ёймоқ* феъллари эса 'нарсани катта очмоқ' маъно тузилишига эга. Уларнинг маъно тузилишидаги умумий узв 'нарса' дир. Худди шу 'нарса' узвига кўра юмуш феъллари объект валенти ифодаловчилари билан ҳам мослашади, яъни *очмоқ, ёзмоқ, ёймоқ, ётмоқ* феълларининг объект валентлиги 'нарса' узвига эга бўлган маъноли сўзларни талаб қиласди. Масалан: Анвар ўргатга дастурхон ёзиб икки лаган манти кўйди (А.Қодирий). Чўл баҳор келинчаги оёғи остига чечаклар билан безалган яшил поёндозни ёйиб ташлади (М.Осим). Ер мўл, қанчадан-қанча ерлар очиш мумкин, сув етарли (Ў.Умарбеков). У Чолбобо билан ишкомда ток очаётган бўлса керак (Х.Ғулом). Бу гапларда *ёзмоқ, ёймоқ, очмоқ* феълларининг объект ифодаловчилари *дастурхон, поёндоз, ер, ток* каби 'нарса' узвига эга бўлган сўзлардир. Бу сўзлардаги 'нарса' узви феъл ва унинг объект ифодаловчисини боғловчи классемадир.

2. Сепмоқ, кўймоқ феълларининг маъноларидаги 'суюқлик' узви объект валентлигини юзага келтиради. Йигилган мисолларда сепмоқ феълининг объект ифодаловчиси сув, кўймоқ феълиники эса сув ва чой сўзларидир. Масалан, Тракторчи шу ерга чолни ётқизиб, кўкрагига сув сепаётган эди (Ў.Умарбеков). Термосдан чой кўйиб бераётсиб: Оббо, ўғлим-её...-деб кўйди. (Х.Тўхтабоев). Бу гапларда *сепмоқ, кўймоқ* феълларининг объект ифодаловчилари *сув ва чой* сўзларидир.

3. *Юкламоқ, кўтармоқ, ортмоқ, ташимоқ* феълларининг маъно тузилишидаги 'юк' узви уларнинг объект ифодаловчиларида ҳам ўз аксини топади, яъни сўз бирикмаси компонентларининг маънолари шу узва кесишади. Йигилган мисолларда ушбу феълларининг объект ифодаловчилари куйидагилардир: *Қон, чироқ, юк, қакир-кукир, тобут, кўч-кўрон, ажнос, жавоҳирот, этак, ўзит*. Масалан: Онасининг қакир-кукирларини ортиб эрининг уйига келди (А.Қодирий). Туш кўрсам, онам чироқ кўтариб юрганимиш (Ў.Хошим). Кўргонларни ҳам туяларга юклаб жўнадилар (Ўзб.Х.О.И). Бу гаплардаги *ортмоқ, кўтармоқ, юкламоқ* феълларининг объект валентлиги қакир-кукир, чироқ, кўргон сўзлари орқали ифодаланган.

**4. Кавламоқ, қазимоқ, чопмоқ** феъллари маъно тузилишидаги 'ерни ўймоқ' узви уларнинг обьект валентлигини юзага келтиради. Объект ифодаловчилари 'ер' билан боғлиқ бўлган нарсаларни билдиради, фикримизни йигилган мисоллар ҳам тасдиклайди. Бу феълларнинг обьект ифодаловчилари қўйидаги сўзлардир. Чукур, молхона, канал, зовур, ўра, ўқарик, селхона, жарлик, ер, жой. Масалан: Қош корайгунча канал кавларди (Х.Фулом). Чолбобо анчагина чукур қазиб қўйган (Х.Фулом). Сиз шу жарликни чопинг (Ў.Умарбеков). Бу гапларда **кавламоқ, қазимоқ, чопмоқ** феълларининг обьекти **канал, чукур, жарлик** сўзлари орқали ифодаланган. Ушбу сўзларни феъл билан боғловчи классема 'ер' узвидир.

**5. Йиғмоқ, узмоқ, термоқ, ўрмоқ, юлмоқ** феълларининг маъно тузилишидаги 'экин' узви обьект валентлигини юзага келтиради. Шу классемада ҳар иккала маъно тузилиши мослашади. Йиғилган карточкаларни кўздан кечирсак, қўйидаги сўзлар юмуш феълларининг обьект ифодаловчиси бўлганини кўрамиз: мева, пахта, дарахт, чигит, тарвуз, бедазор, ўт, қамиш, гўза. Мисоллар: Ана шу кўриб турганингиз ўн гектар ердаги гўзани олтовимиз экканмиз (Х.Тўхтабоев). 0.8 процент пахтани октабрда яrim кунда териб топширса бўлади (Х.Фулом). Тўқай қамишини комбинат ўриб кетадиган бўлди (Х.Фулом). Бу гапларда **гўза, пахта, қамиш** сўзлари экмоқ, термоқ, ўрмоқ феълларининг обьект ифодаловчисидир. Термоқ феъли кўп маъноли бўлганлигидан кўчма маъносидаги узвлари билан ҳам мослашувчи обьект ифодаловчиларига эга эканлигини кўрдик. Фишт, ўтин, рақам, столстул каби. Масалан, Тушган чўғларни қўрага терди (Х.Фулом). Телефон рақамларини тера бошлади (Ў.Усмонов). Бу гапларда чўғ, рақам сўзлари термоқ феълининг обьект ифодаловчилариридир. Уларнинг классемаси термоқ феълининг кўчма маъно тузилишидаги узв билан мослашади.

**6. Қаламоқ, ёқмоқ, ўчирмоқ** феълларининг маъно тузилишида 'олов' узви мавжуд. Ушбу узв феъл ва обьект ифодаловчиларининг маъноларини туташтирувчи классема хисобланади. Мисоллардаги обьект ифодаловчи сўзларни кўриб чиқайлик: қамиш, олов, ўт, шам, кийим. Масалан: Афанди ўчоққа ўт ёкишга кўп уринди (Латифалар). Мана энди Мирзачўлда қамиш ёқиб, шўр ялаб ўтиргандир (А.Қахҳор). Чап тарафингизда гугурт бор, олиб шамни ёқиб юборинг (Латифалар). Бу гапларда **ўт, қамиш, шам** сўзлари

**ёқмоқ** феълининг объект ифодаловчисидир, уларнинг маъноларини туташтирувчи классема 'олов' узвидир.

**7. Курмоқ, солмоқ** феъллари маъно тузилишида 'бино, жой' узви мавжуд. Ушбу узв уларнинг объект ифодаловчилари маъносида ҳам бор бўлиб, буни йигилган мисолларда кўриш мумкин. Бу феълларнинг объект ифодаловчилари куйидаги сўзлардир: чодир, кўргон, теплица, уй, отхона, санаторий, боғча, завод, совхоз, шийпон, кўшк, иморат, масжид, мадраса. Масалан: Бир кунмас бир кун у албатта ўзи янги уй қурари (Ў.Умарбеков). Ростмана шийпон қурамиз (Ҳ.Фулом). Амаким ҳовлига янги иморат солди. Бу гапларда **курмоқ, солмоқ** феълларининг объект ифодаловчилари уй, шийпон, иморат сўзларидир.

**8. Ясамоқ, яратмоқ** феълларининг маъно тузилишида 'янги жисм' узви мавжуд бўлиб, бу узв унинг объект ифодаловчиларида ҳам бор қуйидаги сўзлардир: глобус, самолёт, кўргон, дастурхон, эшик, ром, ғов, кулча, варрак. Масалан: Бодом тагида ўтириб варрак ясашга тушдим (Ў.Хошимов). Сиз подшо қўргонининг рӯпарасида бир қўргон ясангки, ўзи мисдан бўлсин (Ўзб. Х.О.И.). Уша ўзи келиб тиллақош ясаттириб кетди (Ў.Умарбеков). Бу гаплардаги **варрак, қўргон, тиллақош** сўзлари **ясамоқ** феълининг объект ифодаловчисидир.

**9. Пиширмоқ, сузмоқ, димламоқ, қовурмоқ, тугмоқ, тўғрамоқ, қайнатмоқ, дудламоқ** феъллари маъно тузилишидаги 'емак' узви унинг объект ифодаловчилари маъно тузилишида ҳам мавжуд бўлган классемадир. Мисолларни кўриб чиқсак шу фикримиз тасдиқланади. **Ош, овқат, чучвара, гўшт, балиқ, тухум, манти** каби сўзлар ушбу феълларнинг объект ифодаловчиси бўлиб келган. Масалан: Зумрад биби ош сузишга лаган юва бошлади (Ҳ.Фулом). У овқат сувгани ошхонага ўтди (М.Ҳазратқулов). Гўштни онангга тўғраб бер (А.Қодирий). Бу гапларда **сузмоқ, тўғрамоқ** феълларнинг объект ифодаловчиси **ош, овқат, гўшт** сўзларидир.

**10. Супурмок** феълининг маъно тузилиши 'саҳн юзасини' 'кераксиз нарсалардан' 'тозалаш' узвларидан иборат. Аслида туташтирувчи узв 'кераксиз нарса'. Сўзлашувда туташтирувчи классемали маънога эга бўлган сўз кўпинча тушиб қолади, яъни атрофдаги ахлатин **супурмок**, ҳовлини **супурмок** кўринишида бўлади. Бу кўринишида юмуш феъли билан объект ифодаловчисини

туташтирувчи классема уларнинг маъно тузилишидаги 'саҳн' узви бўлади. Масалан: Мактабда хуснихат машқ қилиб ўтирувчи болалар ичидан иккитасини гулзорни супуриб, сув сепишга буюрди (А.Қодирий). Бориб аркони давлатнинг дарвозасини супура бошлади (Ўзб.Х.И.О). Бу гапларда **гулзор**, **дарвозахона** каби 'саҳн' маъносидаги сўзлар супурмоқ феълининг обьект ифодаловчиси бўлиб келган. Баъзан эса **супурмоқ**, феълининг обьект ифодаловчиси унинг ҳакиқий обьекти маъносидаги 'нарса' узви билан мослашувчи маънога эга бўлган сўзлар бўлади. Масалан: Ўн саккиз яшар қизи айвонда қор супуран эди (Латифалар). Бу гапда супурмоқ феълининг обьект ифодаловчиси қор сўзиdir. Супурмоқ феъли билан қор сўзининг классемаси 'нарса' увидир.

11. **Ювмоқ**, чаймоқ феълларининг маъносида 'сув билан' 'нарсани' ёки 'саҳни тозаламоқ' узвлари бўлиб, 'нарса' ва 'саҳн' маъносидаги сўзлар уларнинг обьект ифодаловчилари бўлиб қолади. Лекин 'сув билан' узви ҳал қилувчи ўрин эгаллади, яъни албатта сув билан тозаланадиган нарсаларгина уларнинг обьект ифодаловчиси бўлиши мумкин. **Қозон-товоқ**, яктак, **қўй калласи**, **кир**, **идиш-товоқ**, **ер**, **шўр**, **мотоцикл** сўзлари ювмоқ сўзининг обьект ифодаловчиси бўлиши мумкин. Масалан: Бир ой тўлмасдан кир ювишга руҳсат бермас эди (А.Қодирий). Афанди ариқ бўйида ўтириб, **қўйнинг калласини ювар** эди (Латифалар). Бу гапларда **кир**, **қўй калласи** кабилар ювмоқ сўзининг обьект ифодаловчилариdir.

12. **Суғормоқ** феълида ҳам 'сув' узви ҳал қилувчи ҳисобланади. Шу билан бирга феълнинг маъно тузилишидаги бошка узвлари билан ҳам обьект ифодаловчисининг маъноси мослашиб келади. 'Экин'га ва 'жонивор'ларга 'сув бермоқ' **суғормоқ** феълининг маъно тузилиши бўлса 'экинга' 'жониворларга' узвлари феъл ва обьект ифодаловчиларини туташтирувчи классемадир. Масалан: Туни билан ғўза суғордим (Ҳ.Ғулом). Бултур баҳорда эшигимиз олдидағи гулларни суғорётган эдим (Ў.Ҳошимов). Анхорда **кўй-эчкиларни суғорди**. Бу гапларда **суғормоқ** феълининг обьект ифодаловчилари ғўза, гуллар **кўй-эчки** сўзларидир. Бошка мисолларда **суғормоқ** феълининг обьект ифодаловчилари **шахта**, **от**, **зшак** каби сўзлар бўлган.

13. **Соғмоқ** феълининг маъно тузилишидаги 'сут олиш' узви сут эмизувчи ҳайвонларни билдирувчи, яъни **сигир**, **туя**, **бия**, **кўй**, эчки каби сўзларни тақазо этади. Йигилган мисолларда **соғмоқ** сўзининг обьект ифодаловчиси **кўпинча сигир** сўзи бўлган.

Масалан: Зумрад биби бостирмада сигир соғяпти (Х.Гулом). Ойим бўлса уйимиздан уч юз метр наридаги фермада сигир соғади (Ў.Хошимов). Ойим чўнқайиб ўтириб эчки соғаётган экан (Ў.Хошимов).

14. **Бўғизламоқ, сўймоқ** феъллари ҳам 'жонивор' узвига эга. Шу узв уларни объект ифодаловчилари билан боғловчи классемадир. Шунинг учун бу феълларнинг объект ифодаловчилари **от-улов, жонивор, кўчкор, кўй, эчки сўзлари**дир. Масалан, Муштумзўрлар мол-мулкини яшираётганини от-уловни сўяётганини (А.Қаҳхор). Агар шаҳаншоҳ бизга меҳмон бўлиб келса яхшилаб зиёфат қиласиз, оёғига қирқ кўчкор сўяимиз (М.Осим). Бу гапларда сўймоқ феълининг объект ифодаловчиси 'жонивор' классемасига эга бўлган **от-улов, кўчкор сўзлари**дир.

15. **Кесмоқ, қирқмоқ, арраламоқ** феъллари 'бўлакка ажратмоқ' узвига кўра умумлашади. Бу феъллар восита қурол валентлигига кўра фарқланади. Объект ифодаловчиси ҳам шунга яраша бўлади, яъни кесмоқ – 'пичоқ билан, болта билан' бўлинадиган, қирқмоқ – 'кайчи билан' бўлинадиган, арраламоқ – 'арра билан' бўлинадиган нарсаларни билдирувчи сўзлар билан реаллашади. Шунга кўра кесмоқ феълининг объект ифодаловчиси **ток, ўқнинг учи, атлас, арраламоқ** феълининг объект ифодаловчиси **ёғоч, ўтин сўзлари**дир. Масалан: Ясоққа етказиш – халойик олдидা бошини кесиш деган гап эди (П.Қодиров). Ўқнинг учи чиқиб қолганда, унинг пат ёпиширилган учини қирқиб ташлаб, сугуриб олиш қийин эмасди (М.Осим). Йигитларнинг мақсади кўприкнинг икки томонида турган ўқ ёғочларни арралаб, уни бир икки жойидан узиб ташлаш эди (П.Қодиров). Бу гапларда **кесмоқ** феълининг объект ифодаловчиси бош, **қирқмоқ** феълинини **ўқнинг учи, арраламоқ** феълинини эса ўқ ёғоч сўзларидир.

16. **Қормоқ** феълининг маъно тузилишида 'кукун массани', 'аралаштириб', 'куюқ масса', 'ҳосил қилмоқ' узвлари бор. Шу 'куюқ масса' аксарият **ҳамир** сўзи бўлиб, баъзан у **керт ёки цемент** каби аралаштириб ҳосил қилинадиган нарсалар ҳам бўлиши мумкин. Масалан: Зумрад биби айвонда супра ёзиг ҳамир қорарди (Х.Гулом). Феруза қўлининг ҳамирини унга қориб тушириб, уйга кириб кетди (Х.Гулом). У молларга керт қориб берди. Бу гапларда қормоқ феълининг объект ифодаловчилари **ҳамир ва керт сўзлари**дир.

**17. Ўрамоқ, боғламоқ** феълларининг маъно тузилишида 'тир айлантириб' 'ёлмоқ' 'нарса айлантириб маҳкамламоқ' узвлари бор. Объект ифодаловчиларининг маъноси ҳам шу маъно узвларига мос келади. 'Айлантирадиган нарса' узвий ушбу феълларининг объект ифодаловчиси билан кесишувчи классема хисобланади. **Ўрамоқ, боғламоқ** феълларининг объект ифодаловчилари куйидаги сўзлардир: Салла, мен, тақинчоқ, отлик, камар, от, мен оғзи, рўмол каби. Масалан: Артиниб бўлиб, қимматбаҳо шойи тўнини кийди, салласини ўраб саройга жўнади (М.Осим). Шохимиз сафар камарини белига боғлади (М.Осим). Чопар сакраб эгардан тушди-ю, отини қозиққа боғлади (М.Осим). Бу гапларда **ўрамоқ, боғламоқ** феълларининг объект ифодаловчиси салла, мен, камар, от сўзларидир.

Чуқурроқ таҳлил қиласиган бўлсак, ушбу мисоллардаги салла ва камар сўзлари ўровчи, боғловчи воситалар бўлиб, худди нариги мисоллардаги кўрпага мени ўради, отни арқон билан боғлади каби бўлиши керак эди. Аммо бу мисолларда салла ва камар актив ҳаракатланувчи сифатида олдинги планга ўтган ва объект сифатида берилган. Ҳақиқатан, ҳаракат ўша айланадиган салла ва камарга ўтади ҳамда улар объект ифодаловчисига айланади. Солиширинг, саллани бошга ўради билан мени кўрпага ўради гаплари орасида катта фарқ бор. Мени ўради бўлса, кўрпа восита мен олдинги планга ўтади. Саллани бошга ўради деганда эса ҳаракатдан мақсад саллани бошга ўраб кўндириб қўйиш. Саллани айлантириш олдинги планга ўтади.

**18. Қокмоқ** феълининг маъно тузилишидаги 'уриб туширмоқ' ёки 'уриб кирғизмоқ' узвлари объект ифодаловчиларида ҳам ўз аксини топади. Мисолларни кўриб чиқсак, ушбу феълнинг объект ифодаловчилари этак, ёнғоқ, қозиқ, миҳ сўзларидир. Шулардан этак сўзи гапдаги элипсисга учраган чанг сўзининг ўрнига объект ифодаловчиси бўлиб қолган. Масалан: Сидикжон этагини қошиб ўрнидан турди-ю, жадаллаганича кўча эшикка қараб кетди (А.Қахҳор). Аслида ушбу гапда **қокмоқ** феълининг объект ифодаловчиси этагидаги чанг сўз биримасидаги чанг сўзидир, лекин бу сўз элипсисга учраб қисқарган ва объект ифодаловчиси этак сўзи бўлиб қолган.

Колган мисолларда объект ифодоловчиси ўз ўрнида келган: Раъно келиб Мансурни турғизди ва кийимига ўтирган чангларни қоқди (А.Қодирий). Катта танаффусда ўқитувчиларнинг кўзини

шамғалат қилиб ёнғоқ қоқардик (Ү.Хошимов). Бу гапда **коқмоқ** феълининг объект ифодаловчиси чанг, ёнғоқ сўзларидир.

19. **Кўммоқ** сўзининг маъно тузилишида 'ер остига' 'жойламок' узвлари бор. Унинг объект ифодаловчилари **киши**, **у**, **кўз**, **ўлик**, **селхона**, **сабзи**, **картошка** каби сўзлардир. Масалан: Кейин уни маҳалла кўмди (Ү.Хошимов). Баъзи қишлоқларда кадимги селхоналарни кўмиб, гўза экишаётганниш (Ҳ.Ғулом). Бу гаплардаги **кўммоқ** феълининг объект ифодаловчилари **у**, **селхона** сўзларидир.

20. **Хайдамоқ** феълининг бош маъноси 'киши ва жониворларни' 'хузуридан' 'нарилатмоқ' узвларига эга. Бош маънодаги **хайдамоқ** феълининг объект ифодаловчилари ана шу узвларга мос келади. Масалан: У беҳисоб қўй подаларини хайдаб күёш қархисига юрятти (Ў.Умарбеков). Бу гапда **хайдамоқ** феълининг объект ифодаловчиси **пода** сўзидир.

**Хайдамоқ** феълининг кўчма маънолари ҳам бор. Бири 'техникани юргизмоқ'. Масалан: Норкўзи машина хайдаб бораради (Ҳ.Ғулом). Бу гапда **хайдамоқ** феълининг объект ифодаловчиси **машина** сўзидир. У юқоридаги маъно тузилишига тўлиқ мос келади.

Ушбу феъльнинг яна бир маъноси 'техникани юргизиб' тупроққа 'ишлов бермоқ'. Масалан: Ерларни хайдаш керак (М.Ҳазраткулов). Бу гапда **хайдамоқ** феълининг объект ифодаловчиси **ер** сўзидир.

Битта сўз турли маънода турлича объект ифодаловчиларига эга эканлигини кўрдик. Шундай экан, турли феълларнинг объект ифодаловчилари яна ҳам кўп гурухларга бўлиниб кетади. Бунда феъл ва объект ифодаловчилари умумий узв классемага эга бўлади. Масалан: **чувимоқ**, **ўтказмоқ**, **эммоқ**, **термоқ**, **юлмоқ**, **йигмоқ**, **суғормоқ**, **ўрмоқ**, **қирқмоқ**, **узмоқ** феълларининг объект ифодаловчилари маъно тузилишида 'Экин' узви бўлган қўйидаги сўзлардир, **қамиш**, **мева**, **дараҳт**, **пахта**, **чиғит**, **буғдой**, **ғўза**, **тарвуз**, **ўт**, **занг**, **ток**, **туп**, **гул**, **уруг**, **кўчат**, **кўсақ**. 'Экин' узви уларнинг классемасидир. Масалан: Шу йилнинг ўзида ўн минг туп экармиш (Ҳ.Ғулом).

**Кормоқ**, **ёпмоқ**, **тўғрамоқ**, **қуймоқ**, **тайёрламоқ**, **кесмоқ**, **тутгмоқ**, **сузмоқ**, **ювмоқ**, **узмоқ**, **ушатмоқ** феълларининг объект ифодаловчилари 'емак' узви бўлган қўйидаги сўзлардир. Нон, **гўшт**, **юй**, **манти**, **савзи**, **ҳамир**, **овқат**, **бодринг**, **пиёз**, **ош**, **зогора**. Масалан: Уйда нон ёпилмаганидек, бозордан ҳам сотиб олинмасди (А.Қодирий).

**Сепмоқ, күймоқ, ичмоқ** феълларининг маъно тузилишидаги 'суюқлик' узви объект валентлигини юзага келтиради. Улар куйидагилардир: **сув, чой, сут, шароб, айрон, май, қимиз.** Масалан: Кун ботиши билан онам ҳовлига сув сепар эди (Ў.Хошимов).

**Тутмоқ, соғмоқ, сўймоқ, ҳайдамоқ** феълларининг 'жонивор' узви объект валентлиги билан боғловчи классема ҳисобланади. Уларнинг объект ифодоловчилари қуйидагилардир: **кўй, кучук, илон, сигир, қўчкор, пода, от-улов, эчки, мушук, бузоқ.** Масалан: Хотини сигирни согаётганда...(Латифалар). Бир пасда бештacha чумчук тутиб келишди (Ў.Умарбеков).

**Курмоқ, солмок, бузоқ, тайёрламоқ, ясамоқ** феъллари маъносидаги 'бино, жой' узви объект валентлигини юзага келтиради. Куйидаги сўзлар уларнинг объект ифодоловчилари бўлиб келган:  **завод, девор, ҳаммом, уй, шийпон, қўргон, айвон,** чодир. Масалан: Кейинчалик ёнига кичкина бир консерва заводи куриш мумкин (Ў.Умарбеков).

**Тикмоқ, тўқимоқ, ювмоқ, бўлмоқ, қирқмоқ, чаймоқ, бичмоқ, мойламоқ** феълларининг маъносидаги 'кийим' узви объект валентлигини юзага келтиради. Уларнинг объект ифодоловчилари куйидаги сўзлардир:  **шим, этик, туфли, чок-пок, духоба, кир, қўйлак.** Масалан: Салтанат майда-чуйда кирларни чайиб ёди (Ў.Усмонов).

**Текисламоқ, кавламоқ, ўймоқ, ҳайдамоқ** феъллари маъносидаги 'ер' узви объект валентлигини юзага келтиради. Куйидаги сўзлар ушбу феълларнинг объект ифодоловчилари:  **зовур, чукур, ер, ўчок, ўра, тепа, ўқ, ариқ, дўнг, жарлик, жой.** Масалан: Икки смена ер ағдарамиз (Х.Ғулом).

Ушбу феъллар гурухини бир-бири билан аралаштириб ёки алмаштириб бўлмайди, яъни бири ўрнида иккинчисини кўллаб бўлмайди. Ҳар бир феъл маъносидаги биронта узви унинг объект валентлигини келтириб чиқаради. Демак, объект валентлиги зарурӣ ва шакллантирувчи валентлик ҳисобланади.

Биз юқорида объект ифодоловчиларининг турли маънолардаги турдош отлар билан ифодаланган мисолларни таҳлил қилдик. Турдош отлар ўрнида баъзан бошқа сўз туркумига оид объект ифодаловчиси бўлган мисоллар хам учрайди. Агар уларни турдош отлар билан алмаштироқчи бўлсақ, ҳар бир феъл мослашувчи

класссема бўйича турдош отларни талаб қиласди. Бу, албаттага, биз юқорида гурухларга ажратган тартибга мос келадиган сўз бўлади.

Энди объект ифодаловчиси бошқа сўз туркуми орқали ифодаланган мисолларни кўриб чиқамиз.

Объект ифодаловчиси атоқли от бўлиши мумкин. Масалан: Ҳозир негадир. Орифни тутиб олиб дўппослагим, биқинига, бошига роса муштлагим келиб кетди (Х.Тўхтабоев). Анвар оҳорлик янги йўргак кўрмаганидек, оғаларининг бир эски бешигига тўққизинчя кун беланди эмас, тиқилди (А.Қодирий). Бу гапларда дўппосламоқ, беламоқ феълларининг объект ифодаловчиси Ориф, Анвар сўзларидир.

Объект валентлиги олмошнинг ҳар хил турлари билан ифодаланиши мумкин.

1) кишилик олмошлари билан: Кейин мени шоша-пиша кўрпачага ўради (Ў.Ҳошимов). Шунда уни отаси даст кўтариб бағрига босди (Ў.Умарбеков). Бу гапларда ўрамоқ, кўтармоқ феълларининг объект ифодаловчиси мен, у олмошидир.

2) сўроқ олмошлари билан: Лойга нима қўшилган? (Латифалар). Бу гапда қўшмоқ феълининг объект ифодаловчиси нима сўроқ олмошидир.

3) кўрсатиш олмошлари билан: Ҳали кўрак кўп. Уни чувиш кера (Х.Ғулом). Афанди шуни бўяб берсангиз (Латифалар). Бу гапларда чувимоқ, бўямоқ феълларининг объект ифодаловчиси у, шу олмошларидир.

4) ўзлик олмоши билан: Рўмоли билан манглайдаги терларни артиб, ўзини елшиди (А.Қодирий). Кўрсам, қараб туармидим ўзларини боғлаб кўядим... (Ў.Умарбеков). Бу гапларда елшимоқ, боғламоқ феълларининг объект ифодаловчиси ўз олмошидир.

5) белгилаш олмошлари билан: Ҳаммасини сочиб ташлабди-ку (Ў.Ҳошимов). Лекин у киши ҳаммани пахта билан ўлчайдила (Ў.Умарбеков). Бу гапларда сочмоқ, ўлчамоқ феълларининг объект ифодаловчилари ҳамма олмошидир.

Объект ифодаловчи сўзлар отлашган сифат бўлиши мумкин. Масалан: Майли ўғлим, келинимга мен ундан яхшинини яса бераман (Ў.Умарбеков). Бу гапда ясамоқ феълининг объект ифодаловчиси яхши сўзиdir.

Объект ифодаловчилари отлашган сон бўлиши мумкин. Масалан: Шундан биттасини ушатиб, она-бола ердик (Ў.Ҳошимов). Кейин ўзим яхши кўрган шоколаддан икки-учта узатиб – бор энди

бирпас үйнаб келгин-дейди (Х.Тұхтабоев). Бу гапларда **ушатмок**, **узатмок** феълларининг объект ифодаловчиси **битта, икки – учта сүзларидир**.

Объект ифодаловчилари радиш бўлиши ҳам мумкин. Масалан: Баҳорда сел келиб, ёзда кургокчилик кучайиб, пахтанинг яримидан кўпи қайта экилди (Ў.Умарбеков). Кўйларинг ҳам борми? –сўрадим молларнинг тагини тозалаб юрган паст бўйли бир боладан (Х.Тұхтабоев). Орасини титкилаган эдим (Х.Тұхтабоев). Бу гапларда **эмок**, **тозаламок**, **титкиламок** феълларининг объект ифодаловчилари **кўп, таг, ора** каби сўзларидир.

Баъзи гапларда объект ифодаловчиси **йўқ**, имплицит яъни яширинган бўлади. Масалан: Ҳозир амаллаб отга оргамиз (Ў.Умарбеков). Трактор ярим кун ишлаб, тизза бўйи ҳайдаб берибди (А.Қаххор). Бир оз сабр килмайсанми, ўзим ёриб бермайманми (Ў.Хошимов). Бу гапларда **ортмок**, **ҳайдамок**, **ёрмок** юмуш феълларининг объект ифодаловчилари **йўқ**, имплицит ҳолатида. Агар агенс имплицит бўлса, эга кесим мослашувига кўра яъни синтактик усул билан агенс ифодаловчинини аниқлаш ва олмош билан ифодалаш мумкин бўларди. Аммо объект ифодаловчинини бу усул билан келтириб чиқариш мумкин эмас. Объект ифодаловчинини феъл мазмунидан, семантик усул билан топиш мумкин. Масалан, юқоридаги гапларда **ортмок**, **ҳайдамок**, **ёрмок** юмуш феълларининг маъно тузилишидан келиб чиқиб, объект ифодаловчиларини куйидагича аниқлаймиз? **Ортмок** феълининг маъно тузилишидаги 'юк' узви бўйича объект ифодаловчинини топиш мумкин. Масалан, **юк оргамиз, пахта** **ортамиз** каби, **ҳайдамок** феълининг 3-маъносидаги 'ишлов бермок' узви асосида объект ифодаловчиси ер дала сўzlari бўлади. Масалан, ерни **ҳайдамок**, **ёрмок** феъли маъно тузилишидаги 'бўлакка ажратмоқ' узвига кўра ўтии, тараша каби объект ифодаловчиларига эга бўлиши мумкин. Демак, имплицит ҳолатидаги объект ифодаловчинини аниқлаш учун феълнинг семантик хусусиятларига асосланамиз. Бу объект валентлигининг облигатор, яъни зарурий валентлик эканлигини яна бир бор тасдиқлайди.

## ОБЪЕКТ ИФОДАЛОВЧИСИНИНГ ТУРЛИ КЕЛИШИКЛАРДА КЕЛИШИ

Объект ифодаловчиси гапда воситасиз тўлдирувчи вазифасида келар экан, доим уни тушум келишиги формасида кўрамиз.

Жуда кўп гапларда объект ифодаловчиси белгисиз тушум келишигида бўлади. Масалан: ...мана шу ерга Анвар акангга атаб уй солиб берамиз, Раъно (А.Қодирий). У кунни Курбон отага қарашиб ўтказди, кўмир майдалади, хумга сув тўлдири (А.Қаххор). Бодринг узаётган бўлса керак (Ҳ.Ғулом). Бу гапларда **солмоқ, майдаламоқ, узмоқ** феълларининг объект ифодаловчиси **уй, кўмир, бодринг** сўзлари белгисиз тушум келишигида келган. Баъзи гапларда объект ифодаловчиси жўналиш келишигида бўлади. Масалан: Орқасига бир-икки шапатилади (Ў.Хошимов). Эрталаб кимдир секин елкамга туртаетганини пайқаб қолдим (Ў.Хошимов). Афанди хивчин билан уларнинг тиззаларига савалай бошлиди (Латифалар). Бу гапларда **шапатиламоқ, туртмоқ, саваламоқ** феълларининг объект ифодоловчилари орқа, елка, тизза каби жўналиш келишигидаги сўзлардир. Объект ифодаловчилари инсон танасининг қисмларини билдириб келяпти. Демак, объект ифодаловчиларини боланинг орқаси, менинг елкам, уларнинг тиззалари тарзида айтса ҳам бўлади. Энди ушбу сўз бирикмаларининг биринчи эмас, иккинчи қисмини тушириб қолдирсан, гапларимиздаги объект-феъл бирикмаси куйидагича бўлади, болани **шапатилади, мени туртди, уларни савалади**. Демак, бу гапларда ҳам объект ифодаловчилари иш-ҳаракат ўтаётган, тушум келишигидаги воситасиз тўлдирувчидир. Лекин иш-ҳаракат ўтаётган объект шахс билдирувчи сўз эмас, унинг тана қисмларини англатувчи яъни бутуннинг қисмини ифодаловчи сўз бўлгани учун **у боланинг орқасига шапатилади, менинг елкамга туртди, уларнинг тиззаларига савалади** тарзида берилган.

Бутуннинг қисмини билдирувчи объект ифодаловчилари баъзан чиқиш келишигида бўлади: Кейин ўзим яхши кўрган шоколаддан узатиб – бор, энди бирпас ўйнаб келгин, дейди (Х.Тўхтабоев). Янаги йилданоқ далаларнинг барига шу Азизнинг давидан экардим (Ў.Усмонов). Бу гапларда **узатмоқ, экмоқ** феълларининг объект ифодаловчилари шоколад, нав сўзлариидир. Ларни ҳам юқоридагидек тўлдириб таҳлил қилсан, куйидаги

**ҳолни кўрамиз: шоколаддан иккитасини узатиш, навидан озгина экардим.**

Демак, бутуннинг кисмини билдирганда, объект ифодаловчиси тушум келишигига келмайди, ў ё жўналиш келишигига, ё чиқиш келишигига бўлади. Бир канча гапларда объект ифодаловчиси бутуннинг кисмини ифодалаётгани тўлиқ акс этган. Масалан: Шундан биттасини ушатиб, она-бода ердик (Ў.Хошимов). Натирдан бир бурдагина ушатиб, ҳовузнинг ўртасига отди (F.Фулом). Бу гапларда ушатмоқ феълининг объект ифодаловчиси биттаси, бир-бурда сўзларидир.

Ошмоқ феълининг 'тўсикдан ўтмоқ' маъноси маълум бир чегараланган объект ифодаловчиларига эга. Улар девор, довон, тоғ каби сўзлар бўлиб, доим чиқиш келишигига келади.Бу бутуннинг кисмини ифодалагани учун эмас. Ушбу феълда бундай маънони кўрмаймиз, объект ифодаловчисининг чиқиш келишигига бўлиши феълининг маъно тузилишидан келиб чиқади. Бунда иш-ҳаракат объектта ўтади ва шу билан бирга объект шу ҳаракат жараёнида ортда қолади. Дехқонбой девордан ошибб Ҳафиззанинг олдига ўтмоқчи бўлди (А.Қаххор).

Бу феълининг объект ифодаловчиси белгисиз келиши ҳам тумкин. Лекин барибир чиқиш келишиги маъноси англашилиб туради: Қиз девор ошибб унинг кетидан қувлади (А.Қаххор). Юкоридаги ҳар икки гапда ҳам **ошмоқ** феълининг объект ифодаловчиси чиқиш келишигидаги девор сўзидир.

Хуллас, юмуш феълларининг объект валентлиги шу феълининг маъно тузилишидан келиб чиқади. Улар ҳар бир феълининг маъно тузилишига мос келади. Юмуш феъли ва объект ифодаловчисини умумлаштирувчи, ўзаро мослаштирувчи классема мавжуд бўлади. Объект ифодаловчиси гапда тўлдирувчи вазифасида келади.

## **ЮМУШ ФЕЛЬЛАРИ ФУНКЦИОНАЛ ФОРМАЛАРДА КЕЛГАНДА ОБЪЕКТ ИФОДАЛОВЧИСИННИГ ВАЗИФАЛАРИ**

Юмуш феъллари функционал формаларда келганда, хусусан, сифатдош шаклида объект ифодаловчиларининг гапдаги вазифаси бир хил бўлмайди. Йигилган мисолларнинг кўпчилигига объект ифодаловчининг вазифаси ўзгартмаган, яъни тўлдирувчи. Масалан: Эски пальтосининг устидан елкасига жилд осган Ориф пайдо бўлди (Ў.Хошимов). Ҳовли юзини супуриб-сириб келган Салтанатнинг ранги кув ўчди (Ў.Усмонов). Бу гапларда **осмоқ, супурмоқ** феълларининг объект ифодаловчилари жилд, ҳовли юзи сўзлари гапда тўлдирувчи вазифасида келган.

Юмуш феъллари сифатдош формасида келган баъзи гапларда объект ифодаловчиси аниқловчи-аниқланмиш қурилмасидаги аниқланмиш бўлиб, гапда турли вазифаларда келади. Масалан: Худди Ҳафиза тайёрлайдиган мантининг ўзи (Ў.Умарбеков). Шунча йилдан бери ҳаракат қилиб курган посёлкамиз битди (Ў.Умарбеков). Ҳали ясаган қорбобомни тепиб бузиб ташлади-ку! (Ў.Хошимов). Бу мисолларнинг биринчисида **тайёрламоқ** феълининг объект ифодаловчиси **манти** сўзи гапда қаратқич аниқловчи, иккинчи гапда **курмоқ** феълининг объект ифодаловчиси посёлка гапда эга, учинчи гапда **ясамоқ** феълининг объект ифодаловчиси **корбобо** воситасиз тўлдирувчи вазифаларида келган. Ҳар учала ҳолда сифатдош формасидаги юмуш феъли аниқловчи вазифасида бўлиб, объект ифодаловчиси аниқловчи-аниқланмиш қурилмасидаги аниқланмиш вазифасида келган. Демак, юмуш феъллари сифатдош формасида келганда, фақат агенснинг белгисини билдиричай, объектнинг ҳам белгисини билдиради. Лекин объектнинг зелгисини билдириши учун, албатта, иш-ҳаракатни бажарувчи агент ифодаланган бўлиши керак. Масалан, Ҳафиза тайёрлайдиган **манти**, тарзида. Сифатловчи-сифатланмиш муносабатида агент зелгиси ифодаланса, сифатдош формасидаги юмуш феъли ўғридан-тўғри сифатланмишга боғланиб келади, яъни тайёрлайдиган Ҳафиза, тарзида. Объект белгисини билдирганда эса, иш-ҳаракатни бажарувчи ифодаланмаган бўлса объектга қўшилган галик қўшимчалари орқали агент англашилади. Демак, агар, биз урган посёлка, сўз бирикмасидаги биз тушиб қолса, белгини тўлдирувчи, ҳаракатнинг бажарувчиси куйидагича ифодаланади,

**курган посёлканиз.** Бунда феъл билдириган иш-харакатни бажарувчи эгалик құшимчаси орқали күплик, І шахсада эканлигини англашиляпти.

Бир нечта мисолда аниқланмиш вазифасидаги сұз-тушиб қолиб, юмуш феълининг сифатдоши отлашган. Масалан, Бах-малбоф маҳалла-духоба түқийдиганлар маҳалласи (А.Қодирий). Эрта-индин Үлиб кетсам, тепкилиб құмадиганимдан айрилиб қолдим, айланай (Ү.Хошимов). Эргашевнинг тобугини күтарғанлар орасыда у ҳам бор (Ү.Умарбеков). Бу гапларда тұқымоқ, құммоқ, күтәр-моқ феъллари сифатдош формасида отлашган ва гапда қаратқыч аниқловчи, воситали тұлдирувчи вазифасида келган. Уларнинг объект ифодаловчилари биринчи гапда дұхоба, иккінчи гапда имплицит (мен), учинчи гапда тобут сұzlаридир.

Мажхұл нисбатдаги юмуш феъллари сифатдошининг объект ифодаловчиси доим аниқловчи-аниқланмиш курилмасидаги аниқланмиш бўлиб келади. Масалан: Ялпиз ҳидига қўшилиб димоққа урилган ер ҳиди умрнинг яна бир йили ўтганини эсга солади. Берунийнинг сұzlари оловга сепилған сувдек таъсир кўрсатди (М.Осим).

Равишдош формасида юмуш феълининг валент ифодаловчилари ўз вазифаларини ўзгартирмайдилар. Жумладан, объект ифодаловчиси ҳам, одатдагидек, тұлдирувчи вазифасида келган. Сизнинг ҳам норманлизни териб берамиз (Ү.Умарбеков). Чүлбобо анчагина чукур қазиб қўйган (Х.Ғулом). Ер ўчоклар қазиб бошладилар (М.Осим). Бу гапларда термоқ ва қазимоқ феълларининг объект ифодаловчилари **иorma**, чукур, ўчок сұzlари бўлиб, улар воситасиз тұлдирувчи вазифасида келган.

Юмуш феъллари ҳаракат номи формасида келганды, аксарият, бошка валент ифодаловчилари шу гап таркибида бўлмаслиги мумкин. Бўлган тақдирда ҳам объект ва восита валентлиги ўз ўрнида ва ўз вазифасида бўлади. Масалан: Ҳовлини супуриш, идиш-товоркларни ювиш ўшанинг бўйнида (Х.Тўхтабоев). Мактабда хусниҳат машқ қилиб ўтирувчи болалар ичидан иккитасини гулзорни супуриб, сув сепишига буюрди (А.Қодирий). Афанди ўчоққа ўт ёқишига кўп уринди (Латифалар). Бу гапларда ҳаракат номи формасидаги юмуш феъллари **супурмоқ**, **ювмоқ**, **сепмоқ** ва ёқмоқ бўлиб, уларнинг объект ифодаловчилари **ҳовли**, **идиш-товоқ**, **гулзор**, **сув**, ўт каби сұzlаридир.

Юмуш феъллари сифатдош формасида келса, объект ифодаловчиси бъзан аникловчи+аникламниш қурилмасидаги аникланмиш бўлиб келиши мумкин, агар аникловчи+аникламниш қурилмасидаги аникланмиш агенс бўлса, объект ўз вазифасида, яъни воситасиз тўлдирувчи бўлиб келади. Юмуш феъли мажхул нисбатдаги сифатдош бўлса, объект ифодаловчиси, албатта, аникловчи+аникламниш қурилмасидаги аникланмиш бўлади.

Юмуш феъллари равишдош шаклида бўлса, объект ифодаловчи воситасиз тўлдирувчи вазифасида келади.

Юмуш феъллари харакат номи бўлса, объект ифодаловчининг гапдаги вазифаси ўзгармайди. Улар гапда кўпинча реаллашмайди, агар мавжуд бўлган тақдирда, гапда воситасиз тўлдирувчи вазифасида бўлади.

## **ЮМУШ ФЕЪЛЛАРИ ТУРЛИ НИСБАТЛАРДА КЕЛГАНДА ОБЪЕКТ ИФОДАЛОВЧИСИНИНГ ГАПДАГИ ВАЗИФАСИ**

Феъл нисбатлари феълнинг гапдаги бошқа сўзлар билан муносабатини ўзгартириб юборувчи категориядир. Шунинг учун унинг объект билан муносабати ҳам, объектнинг гапдаги вазифаси ҳам ўзгариб келади. Буни биз феълнинг ҳар бир нисбатини ўрганганимизда яққол кўрамиз.

1. Ўзлик нисбати феълни ўтимсизлаштиради. Шунинг учун юмуш феъллари ўзлик нисбатида келса, унинг объект ифодаловчиси бўлмайди, ўзлик нисбатида феъл билдирган иш-ҳаракат агенсга қайтади. Демак, объект вазифасини ҳам агенснинг ўзи бажаради. Масалан: Бемор шунча даволанса ҳам ахволи яхшиланмас эди. Мардикорлар енгил-елли чайиниб, тушликка ўтиришди (Газетадан). Бу гапдаги даволамоқ, чаймоқ феъллари ўзлик нисбатида, улар билдирган иш-ҳаракат агенсга, яъни бемор ва мардикор сўзларига қайтяпти. Демак, уларнинг объект ифодаловчиси мавжуд эмас.

2. Юмуш феъллари мажхул нисбатда бўлганда, уларнинг агенс билан муносабати мавхумлашиб кетади ва гапда ўз ифодасини топмайди. Объект ифодаловчиси эса гапда эга вазифасида келади. Масалан: Оқ шийпон устунларига оқ парда тортилди (Х.Ғулом). Оқ майин жундан, чеккасига ипакдан чиройли ҳошия тикилган (Х.Тўхтабоев). ...супанинг уч тарафига ёз гуллари экилган (А.Қодирий). Бу гапларда тортмоқ, тикмоқ, экмоқ юмуш феълларининг объект ифодаловчилари парда, ҳошия, гул сўзлари бўлиб, улар гапда эга вазифасига келган.

3. Юмуш феъллари биргалик нисбатида келганда фақат бисубъектлилик содир бўлиб, феълнинг объект билан муносабатида ўзариш бўлмайди. Объект ифодаловчиси гапда воситасиз тўлдирувчи бўлиб келади. Масалан: Улар кечгача дарахт экишди (Х.Ғулом). Иккалови бир амаллаб этакларни отга ортишди (Ў.Умарбеков). Қолганлари чўлга кетаётган юкларни араваларга ортишди (Х.Ғулом). Бу гапларда экмоқ, ва ортмоқ феъллари биргалик нисбатида келган бўлиб, уларнинг объект ифодаловчилари дарахт, этак, юқ сўзлари гапда воситасиз тўлдирувчи вазифасида келган.

4. Орттирма нисбатда ҳам юмуш феълларининг агensi иккilanган шахс бўлади, яъни бажаришга ундовчи ва бажарувчи,

аммо объект билан муносабати ўзгармайды. Масалан: Мулозимга сарой ҳовлисини супуртириб.....(М.Осим). Сатторкул аканг уйини оклатди (А.Қаҳхор)...масжидни қулфлатиб қўйган (Латифалар). Бу гапларда орттирма нисбатдаги **супурмок**, **окламок**, **қулфламок** феълларининг объект ифодаловчилари **ҳовли**, **уй**, **масжид** сўзлари бўлиб, улар гапда воситасиз тўлдирувчи вазифасида келган.

Демак, юмуш феъли билан объект ифодаловчисининг муносабати биргалик ва орттирма нисбатларда ўзгаришсиз қолар экан.

Хуллас, юмуш феъли аниқ нисбатда бўлса, объект ифодаловчиси воситасиз тўлдирувчи вазифасида бўлади. Юмуш феъли ўзлик нисбатда келса объект ифодаловчиси бўлмайди, харакат ўтувчи сўз агенснинг ўзи бўлади.

Юмуш феъллари орттирма ва биргалик нисбатларида келганда, объект ифодаловчисининг вазифасида ўзгармайди. Гапда у воситасиз тўлдирувчи вазифасида келади.

## ЮМУШ ФЕЛЬЛАРИДА ПАЦИЕНС

Юмуш феълларида ҳам морфологик, ҳам семантик каузация кузатилади. Кўп юмуш феъллари каузативдир. Бу феълларнинг маъно қурилмасидан келиб чиқади. Юмуш феълларининг маъно қурилмасида 'ижро' семаси бўлиб, улар ҳаракатнинг обьектига фақат ўтибина қолмай, ўша обьектда якунланишини ҳам билдиради. Бу эса каузативлик хусусиятига тўлиқ мос келади. Бундан ташқари барча юмуш феъллари ўтимлидир. Ўтимли феълларнинг семантикасида каузатив муносабат ифода этилади.

Каузатив юмуш феъллари аниқ нисбатда келганда, агенс шахс ифодаловчи сўз бўлиб, гапда эга вазифасини бажаради. Пациенс эса шахс ифодаловчи, жоноворларни билдирувчи сўз бўлиши мумкин ва тўлдирувчи вазифасида келади.

Пациенс жоноворларни билдирувчи сўз бўлган мисолларни кўриб чиқайлик. Бунда контакт-каузативни ҳам, дистант-каузативни ҳам учратиш мумкин.<sup>10</sup> Бу, албатта, феъл билдирган маъно билан боғлиқ. Масалан: Бола йўлда бир киши бир мушукни миёвлатиб, уриб, судраб юрганини кўрди (Ўзб.Х.Ў.И). Ушбу гапда **судрамоқ** феълидан англашилган иш-ҳаракат пациентс – мушукда пассив акс этади. Бунда агенс – бир **кишининг** иш-ҳаракатни амалга ошириши биринчи навбатга ўтади. Демак, бу гапда контакт-каузативни кўрамиз.

Бошқа бир мисолда эса пациентсининг ҳаракати олдинги навбатга ўтиб, агенс ана шу иш-ҳаракатни амалга оширишда йўл қўювчи бўлиб қолади. Демак, бу дистант-каузативдир. Масалан Ёнгокқа боғлаб кўйилган эчкини икки марта сурордим (Ў.Хошимов). Бу гапда юмуш феъли **суформоқ**, агенси-имплицит (мен), пациентси эчки сўзи бўлиб, агенс (шахс) таъсирида пациентс (эчки) иш-ҳаракатни амалга оширган (сув ичган). Агенснинг ҳаракати орқа планга ўтган.

Дистант-каузативли гапларнинг бирида пациентс шахс билдирувчи сўз бўлиб, у гапда ифодаланмаган (имплицит). Лекин гапнинг маъносидан у англашилиб туради: Дўстларим: “Жуда сиқилиб кетдингиз, айланиб келамиз”, деб тоқقا судрашиб (Ў.Хошимов). Бу гапда юмуш феъли **судрамоқ**, агенси дўстларим, пациентси имплицит (мени).

Морфологик каузативда пациентс доимо шахсни билдиради. Чунки орттирма нисбат феълнинг агенсини обьектга айлантирад

экан, биз биламизки, юмуш феълларининг агенси доимо шахс билдирувчи сўзdir. Мисолларни кузатганимизда, морфологик каузативли гапларда пациент гоҳ имплицит, гоҳ экплицит<sup>8</sup> ҳолда шахсни англатади. Масалан: ...мулозимга сарой ҳовлисини супуртириб қўйди (М.Осим). Бу гапда орттирма нисбатдаги **супурмок** феълининг агенси имплицит (у), пациенти **мулозим**. Ушбу мисолда морфологик кузатувига хос яна бир хусусиятни учратамиз. Пациент воситали тўлдирувчи вазифасида келган. Лекин бу ҳамма гапларда ҳам ўз аксини топавермайди. Демак, морфологик каузативли гапларда гарчанд шу маъно англашилиб турса-да, пациент кучсиз факультатив валентлик ҳисобланади.

Ўша ўзи келиб тиллақош ясаттириб кетди (Ў.Умарбеков). Рўпарадаги деворни буздириб, тешикдан чикиб кетасиз...(М.Осим). Бу гапларда орттирма нисбатдаги **ясамоқ**, бузмоқ феълларининг агенси ўзи, сиз олмошлари бўлиб, пациенти ифодаланмаган (имплицит), лекин гапнинг маъносидан пациент шахс билдирувчи сўзлиги, гапда воситали тўлдирувчи бўлиб келиши англашилади.

Юмуш феъли мажхул нисбатда келганда, пациент гапда эга вазифасида бўлади: Хўжа Абдулланинг фармойиши билан қасрнинг зинапояларига яна поёндоз тўшалди (П.Қодироқ). Оқшом шийпон устунларига оқ парда тортилди (Х.Фулом). Бу гапларда мажхул нисбатдаги тўшамоқ, тортмоқ феълларининг пациенти поёндоз, парда сўзлари эга вазифасида келган.

Келтирилган мисолларга асосланиб, биз шуни айтишимиз мумкинки, юмуш феълларида ҳам морфологик, ҳам семантик каузация учрайди. Шу билан бирга уларнинг орасида контакт-каузатив ҳам, дистант-каузатив ҳам мавжуд.

Юмуш феълларининг пациенти морфологик каузативда шахс ифодаловчи сўз бўлади. Семантик каузативда эса шахс ифодаловчи жонивор ва бошқа предметларни билдирувчи сўз бўлиши мумкин.

### Хулоса

Юмуш феълларининг объект валентлиги таҳлил этилар экан, куйидаги натижаларга келинди.

1. Юмуш феълларининг объект валентлиги реаллашар экан, деярли доим гапда воситали тўлдирувчи вазифасида келади. Бунинг учун юмуш феъллари соғ феъл, равишдош вазифаси шаклида,

аниқлик, биргалик, орттирма нисбатларда құлланыши ва кесимлик вазифасида бүлиши шарт.

2. Юмуш феълининг объект актанти эга вазифасида ҳам келиши мумкин. Бунинг учун юмуш феъллари мажхул нисбатда құлланади.

3. Юмуш феълларининг объект актанти аниқловчили бирикмаларнинг аникланмиши вазифасида келиши мумкин. Бунда феъл аниқлик ва мажхуллик нисбатларидаги сифатдош шаклида құлланади.

4. Юмуш феъллари қаратқичли бирикмаларнинг қаратқичи вазифасида ҳам қайд этилади. Бунда феъл ҳаракат номи шаклида келган бўлади.

5. Объект актанти от, сифат, олмош туркумидаги буюм ёки шахс билдирувчи сўзлар бўлиши мумкин.

## **ВОСИТА ВАЛЕНТЛИГИ ВА УНИНГ ИФОДАЛАНИШИ**

Юмуш феълларининг яна бир зарурий валентлиги – восита (инструмент) валентлигидир. “Феълларнинг инструмент валентлигига эга бўлиши ҳам..унинг ўрин келишикли инструмент актантини қабул қилиши учун имкониятдир. Бунда феъллар ижро семантикасида бўлиши шарт”.<sup>5</sup> Восита валентлиги ҳамма юмуш феълларида ҳам учрамайди. Баъзи феъллар семантикаси албатта “нима билан” деган маънодаги сўзни талаб қилиб туради. Баъзиларида эса аксинча бундай ҳол кузатилмайди. Демак, восита валентлигига эга бўлиш юмуш феълларида чегаралангандир.

Масалан: ...орадан “абжад” сўзини тузук ёзib чиқарган боланинг қўлини боғлаб уйига юборди (А.Қодирий). Носир Пўлатов ҳовлида ток қирқаёттган эди (Ў.Умарбеков). Бу гаплардаги боғламоқ ва қирқмоқ юмуш феъллари ифодалаган ҳаракат албатта бирор восита билан бажарилгани англашилиб туради. 1-гапда рўмолча ёки арқонча билан боғлаш мумкин (кўлни қўлга боғлаб қўёлмайсиз). 2-гапда эса токқайчи билан қирқиш мумкин (кирқмоқ феълининг маъно тузилишида ҳам 'пичоқ' ёки 'қайчи билан' деган узв бор.)

Восита валентлиги мавжуд бўлмаган феълларда эса бу ҳол кузатилмайди. Масалан: Салтанат ўрин солиб берди (Ў.Усмонов). Мен сомовар қўяй (А.Қаҳҳор). Бу гаплардаги солмоқ, қўймоқ юмуш феъллари билдирган иш-ҳаракатни бажаришда инсон кўллари кифоя бўлади, иш қуроли талаб қилинмайди. Масалан, Хўжа Абдулланинг фармойиши билан қасрнинг зинапояларига яна поёндоz тўшалди (П.Қодиров). Чорбоғда тиллакори кўшк курганингизда кўргансиз, Хонзода бегим (П.Қодиров).

Бу гаплардаги тўшамоқ ва қурмоқ феълларининг восита валентлиги йўқ, бу иш-ҳаракатга восита даркор эмас. Тўшамоқ каби феълларида тўшаладиган материалнинг ўзи мантиқан восита, шунинг учун восита валентлигига зарурият бўлмайди.

Восита валентлиги гапда баъзан ўз ифодасини топади, баъзан эса йўқ. Лекин нутқда у яққол англашилиб туради.

**Восита валентлигининг ифодаловчилари икки хил маънони билдиради:**

1. Восита маъноси.
2. Курол маъноси.

Восита маъносига у иш-харакатни бажаришда ёрдамчи нарсаларни билдириб келади. Бунда восита валентлиги киши мучасини ёки бошқа бирон ёрдамчи предметларни ифодалаши мумкин. Масалан: Сўнг сарғиш мўйловини кафти билан артар экан...(П.Қодиров). Йиллар заҳматидан дағал тортган бармоқлари билан пешонамни силагандек бўлди (Ў.Хошимов). Усмонов итни оёғи билан сурисиб айвонга кўтарилиди (Ў.Умарбеков). Бу гапларда артмоқ, силамоқ, сурмоқ феълларининг восита валентлиги ифодаловчилари кафт, бармоқ, оёқ каби инсон мучасини билдирувчи сўзлардир. Улар гапда воситали тўлдирувчи вазифасида келган.

Қиз соchlарини рўмолча билан маҳкам танғиб, белини камар билан боғлаб олган эди (М.Осим). Ойим томогимни аччиқтош билан чайиб кўрди (Ў.Хошимов). Жарга кулаган трактор гусеницалари билан кўкрагини эзиз юборган эди (Ў.Умарбеков). Бу гапларда тағимоқ, боғламоқ, чаймоқ, эзмоқ феълларининг восита ифодаловчилари рўмол, камар, аччиқтош, гусеница каби нарсани билдирувчи сўзлардир.

Тағимоқ, боғламоқ, чаймоқ, артмоқ, сурмоқ, ўрамоқ, ёқмоқ, соғмоқ, урмоқ, ювмоқ, термоқ, боқмоқ, кулфламоқ, мойламоқ, бўямоқ, бузмоқ, сугормоқ, тикмоқ, сепмоқ, ташимоқ, дазмолламоқ феълларида восита валентлиги зарурий валентлик хисобланиб, уларнинг ифодаловчилари восита маъносини билдиради. Уларнинг восита ифодаловчилари турличадир. Масалан: рўмол, камар, кафт, бармоқ, оёқ, кўл, кўрпа, таёқ, совун, ўт, калит, бўёқ, капкир, ип кабилар. Бу сўзлар ўртасида, албаттга, семантик мослик бўлади, яъни улар ўзаро умумий классемага эга бўлади. Масалан, бармоқлари билан сиlamоқ сўз биримасидаги восита ифодаловчиси бармоқ сўзининг маъно тузилиши 'одам панжасининг' 'қисмлари' семаларидан иборат. Сиlamоқ юмуш феълининг маъно тузилиши эса 'маълум юзада' 'оҳиста' 'панжа юргизмоқ' семаларидан иборат. Бу сўзларда 'панжа' семаси классема хисобланади. Бошқа мисолларни ҳам семаларга ажратсак, уларни боғловчи классема мавжудлигига ишонч ҳосил қиласиз. Масалан: Филлар хартуми билан ўраб олиб ерга урар эди (М.Осим).

Курол маъносини билдирувчи восита ифодаловчилари гапда англашилаётган ҳаракатни бажаришдаги иш-куроли вазифасини ўтайди. Курол маъносидаги восита валентлиги маълум бир гурух юмуш феълларида мавжуддир. Бу эса ушбу феълларининг маъносига боғлиқ бўлиб, бу феъллар билдирган иш-ҳаракат бирон-бир иш куролида бажарилиши керак бўлади. **Сўймок**, **чопмок**, **ўрмок**, **кесмок**, **қирқмок** каби. Масалан: Ҷўлбобо кетмон билан ток зангларини очар эди (Х.Ғулом). Ҳовлидаги итни қилич билан чопиб ташайдилар (П.Қодиров). Кейин ойим бандига узун таёқ боғланган бурган супурги билан супуриб чиқади (Ў.Ҳошимов). Бу гапларда очмоқ, чопмок, супурмок феълларининг восита ифодаловчилари кетмон, қилич, супурги сўзларидир.

Чопмок, тикмок, қирқмок, бўлмок, супурмок, бузмок, ўрмок, қазимок, узмок, пармаламок, кавламок, кесмок, ўймок, тўқимок,чувимок, қайрамок, тарамок, сўймок, тўғрамок, қирқмок феълларининг восита ифодаловчиси курол маъносини билдиради. Улар иш-куролни билдирувчи қўйидаги сўзларидир: кетмон, игна, пичоқ, супурги, лўм, ўроқ, белкурак, эгов, қайчи, болға тароқ, қилич каби.

Шу ўринда биз восита валентлиги ифодаловчиларининг иккала гурухини фарқловчи бир мисол келтирамиз. Солиштиринг: тикмоқ феълининг восита ифодаловчиси **игна** бўлса, у курол маъносини билдиради; агар иш бўлса, восита маъносини билдиради.

Восита ифодаловчиларининг гапда ўз ифодасини топиши баъзан кўмакчилар ёрдамида, баъзан эса келишик қўшимчалари орқали бўлади. Деярли барча восита ифодаловчилари билан кўмакчиси ёрдамида ифодаланиши мумкин. Агар келишик қўшимчалари орқали ифодаланса ҳам, уларни билан кўмакчиси билан алмаштириш мумкин бўлади. Демак, асосий, реаллаштирувчи билан кўмакчисидир. Масалан: Фақат мева билан даволайди (Ў.Умарбеков). Қани энди имкони бўлса, шу пичоқ билан оғриётган жойини бураб-бураб олиб ташласа (Ў.Умарбеков). Бу гапларда даволамоқ ва бурамоқ феълларининг восита ифодаловчилари мева, пичоқ сўзлари бўлиб, улар билан кўмакчиси ёрдамида боғланган.

Восита ифодаловчилари **билин** кўмакчиси билан боғланганда қўйидаги маъноларни билдиради.

1. Иш куроли маъноси.
2. Транспорт-восита маъноси.

3. Инсон мучаси маъноси.

4. Восита маъноси.

Масалан: Шу жой жуда зарур бўлса, кунлар юришиб кетганда ўзимиз омоч билан чопиб оламиз, деган эди (Ў.Умарбеков). Чўлбобо эшик олдини кетмон билан текислашга тушди (Х.Гулом). Афанди ёнғокни пичоқ билан икки бўлди (Латифалар). Бу гапларда чошмоқ, текисламоқ, бўлмоқ феълларининг восита ифодаловчилари омоч, кетмон, пичоқ каби иш куроли маъносидаги сўзлар бўлиб, улар билан кўмакчиси ёрдамида бириккан.

Юкларни арава билан ташиб олди. Ерларни трактор билан ҳайдаш керак-да (М.Ҳазраткулов). Бу гапларда ташимоқ, ҳайдамоқ феълларининг восита ифодаловчилари арава, трактор каби транспорт ва техника маъносидаги сўзлар бўлиб, улар билан кўмакчиси ёрдамида бириккан.

...айниқса, сенинг қўлинг билан туғилган мантилардан жуда мамнун бўлдим, Раъно (А.Қодирий). Авлиё бир бармоғим билан кўзингни ўяман, деган эди (Латифалар). Бу гаплардаги тутмоқ, ўймоқ феълларининг восита ифодаловчилари қўл, бармоқ сўзлари бўлиб, одамнинг мучаси маъносини билдиради.

...така мўйлови эса уй ичидаги майда мих билан деворга сим коқарди (Ў.Усмонов). ....рўмоли билан манглайдиги терларни артиб, ўзини елпиди (А.Қодирий). ...ўзи ҳам маҳсили калишининг учи билан ерни титкилай бошлиди (Ў.Хошимов). Бу гаплардаги қоқмоқ, артмоқ ва титкиламоқ феълларининг восита ифодаловчилари мих, рўмол ва калиш сўзлари бўлиб, восита маъносини англатади.

Аввал айтилганидек, восита ифодаловчилари юмуш феълларига келишик қўшимчалари билан ҳам боғланиши кузатилади. Бунда улар ўрин-пайт ёки жўналиш келишигига келиши мумкин. Келишик қўшимчаларини билан кўмакчиси билан алмаштирганимизда, нозик стилистик фарқ сезилади, аммо ҳеч бир маъно ўзгариши содир бўлмайди. Масалан: Сочини устарада қирдирган (Ў.Усмонов). Иссиқ кўрпага ўраб, қайнок-қайнок чой ичиришди (Ў.Хошимов). Бу гапларни қуйидаги тарзда айтсан, хато бўлмайди: Сочини устара билан қирдирган. Иссиқ кўрпа билан ўраб, қайнок-қайнок чой ичиришди. Бу гапларда қирмоқ, ўрамоқ юмуш феълларининг восита ифодаловчилари устара, кўрпа сўзлари бўлиб, улар келишик қўшимчалари билан ҳам, кўмакчилар билан

ҳам реаллашиши мумкин. Бундай мисолларни кўплаб келтириш мумкин.

Баъзи мисоллар борки, уларда келишик қўшимчаси ўрнида билан қўмакчисини кўллаб бўлмайди. Масалан: Подшо боласини кифтида кўтариб келди. У гапдаги восита ифодаловчиси ўрин келишиги қўшимчаси билан келган. Уни билан қўмакчиси билан алмаштириб бўлмайди, яъни, Подшо боласини кифти билан кўтариб келди, дейилмайди.

Иш-ҳаракатнинг маъносига кўра восита ифодаловчилари турли келишикларда келиши мумкин. **Кўтармоқ**, **кирмоқ**, **боғламоқ** феълларининг восита ифодаловчилари ўрин келишигига келган. Бунга биз юқоридаги гапларни мисол қилишимиз мумкин. Шу ўринда **кўтармоқ** феълининг **кифт** сўзи билан иккита гапда икки хил келишик қўшимчаси билан келганини кўрамиз:

1. Болани кифтида кўтарди.
2. Болани кифтига кўтарди.

Биринчи гапда **кифт** сўзи ўрин келишигига келган ва давомли иш-ҳаракатнинг восита ифодаловчиси бўлиб келган.

Иккинчи гапда эса **кўтармоқ** юмуш феъли давомсиз, бир забтли иш-ҳаракат маъносини билдиради ва **кифт** сўзи восита эмас, ўрин маъносини билдирган.

Иккала гапда **кўтармоқ** юмуш феъли **кифт** сўзи билан боғланган. Лекин 1-гапда **кифт** восита ифодаловчиси бўлиб, ўрин келишигига келган ва узоқ муддат болани кўтариб келишда восита вазифасини ўтаганини англатади. 2-гапда эса **кифт** сўзи жўналиш келишигига келган бўлиб, болани кўтариб олинган жой, ўрин маъносини билдиради.

Восита ифодаловчилари ўрин келишигига келар экан, турли маъноларни билдиради.

1. Иш қуроли маъноси.
2. Транспорт-техника маъноси.
3. Инсон мучаси маъноси.
4. Восита маъноси.

Мисоллар келтирамиз.

1. Кўл аррада аралади. Гўштни чопқида майдалаб, қозонга солди. Бу гапларда **арраламоқ**, **майдаламоқ** феълларининг восита ифодаловчилари **арра**, чопқи каби иш қуроли маъносидаги сўзлардир.

**2. Улар станцияга аравалар, извошларда катта-катта чамадонлар, көплар, күрпа-ёстиқлар ортиб келишди (Х.Фулом). ..пахтамизнинг учдан бирини машиналарда тердик (Х.Фулом). Буғдойни комбайнда муддатидан олдин ўриб олишди. Бу гапларда **арава, извош, машина, комбайн** каби транспорт ва техника маъносидаги сўзлар ортмоқ, термоқ ва ўрмоқ феълларининг восита валентлигини ифодалаган.**

**3. Ўрин келишигидаги** восита ифодаловчилари орасида инсон мучасини билдирувчи сўзлар жуда кам учрайди. Учраганда ҳам, таъкидлаш, аниқлаштириш, ажратиб ифодалаш маъноларини беради, яъни автобусда эмас, оёқда келдик ёки машинада эмас, кўлда тикдим каби. Масалан: Онам кирни кўлда ювдилар. Бу гапда ювмоқ феълининг восита ифодаловчиси қўл сўзи ўрин келишигига келган бўлиб, мазмунан она кирни кир машинада эмас, кўлда ювгани таъкидланади.

**4. Болалар** челякда сув ташишди. Гулли дўппини ипакда тики. Бу гапларда **ташимоқ, тикмоқ** феълларининг восита ифодаловчилари челяк, ипак сўзлари бўлиб, улар ўрин келишигига келган. Улар аниқлаштириш, диққатни қаратишга хизмат қиласади.

Восита ифодаловчиси жўналиш келишигига бўлган феъллар ўзига хос маънога эга бўлади. Масалан, **артмоқ ва ўрамоқ** феълларининг восита ифодаловчилари жўналиш келишигига келган. Мисолларга эътибор берайлик: Кейин шоша-пиша кўрпачага ўради (Ў.Хошимов). Оёқларини остонаядаги латтага артиб, ичкари кирди (Ў.Усмонов). Бу гаплардаги **ўрамоқ, артмоқ** феълларининг восита ифодаловчиси кўрпача, латта сўзларидир. Ушбу восита ифодаловчиларини реаллаштирувчи жўналиш келишиги қўшимчасини ўрин келишиги қўшимчаси ва билан кўмакчиси билан алмаштириб кўрамиз:

1. Кўрпачага ўралган.

Сочиққа артилган.

2. Кўрпачада ўралган.

Сочиқда артилган

1. Кўрпача билан ўралган.

Сочиқ билан артилган.

Биринчи мисолларда, яъни восита ифодаловчиси жўналиш келишигига келганда, восита ифодаловчилари эмас, объект ҳаракатда эканлиги англашилади.

Иккинчи мисолларда, яъни восита ифодаловчилари ўрин келишигида келганда, иш-ҳаракат анча олдин бажарилгани, бу эса кечимдан кейинги ҳолат эканлиги англашилади.

Учинчи мисолларда билан кўмакчиси билан келганда, объект эмас, балки восита ифодаловчиси ҳаракатда эканлиги англашилади.

Демак, восита ифодаловчилари турли грамматик формаларда келар экан, маъно тузилишида нозик фарқланиш мавжуд бўлади.

Восита ифодаловчиларини реаллаштирувчи яна бир грамматик форма -лаб равиш ясовчи кўшимчасидир. Бу кўшимчанинг ўрида ҳам билан кўмакчиси ёки ўрин келишиги кўшимчасини қўллаш мумкин бўлади. Масалан: Феруза ош хамирни муштлаб пишита бошлади (Х.Фулом). Фўзанинг устидан чеълаклаб сув куйсак, ширасини ювиб кетади-ку (Х.Тўхтабоев). Бу гапларда пишитмоқ, куймоқ феълларининг восита ифодаловчиси мушт, чеълак сўзларидир. Улар гапда, одатдагидек, воситали тўлдирувчи эмас, равиш ҳоли вазифасида келган.

Баъзан юмуш феълларининг восита ифодаловчиси мавжуд гап курилмасида бўлмаслиги, аммо бундан олдинги бошқа гап курилмасида у мавжуд бўлиши мумкин. Бундай мисоллар жуда кўп учрайди. Уларда восита ифодаловчисининг воситалик вазифаси янада бўрттирилади. Масалан: Дадам икки-уч йилдан бўён бульдозер ҳайдаб, ер текислайди (Х.Тўхтабоев). Сочик ҳўллаб, гиламни тозалади (Х.Фулом). Худди доришуноснинг кил торозусига солиб ўлчагандай (Ў.Усмонов). Бу гаплардаги текисламоқ, тозаламоқ, ўлчамоқ феълларининг восита ифодаловчилари бульдозер, сочиқ, торозу сўзларидир, лекин улар юмуш феъллари билан битта гап тизимида келмаган. Агар бу восита ифодаловчилари билан юмуш феълларини бир тизимга келтирсан, улар кўйидагича кўринишда бўлади: бульдозерда ер текислайди, ҳўл сочиқда гилам тозалайди, кил торозусида ўлчагандай. Демак, текисламоқ, тозаламоқ, ўлчамоқ феълларининг восита ифодаловчилари бульдозер, сочиқ ва торозу сўзлари ўрин келишигида келиши мумкин бўлар экан.

Бир нечта мисолларда восита ифодаловчиси гапда тушум келишигида келиб, воситасиз тўлдирувчи вазифасини бажарган. Лекин бу улар гапда объект ифодаловчиси бўлади, деган гап эмас. Бу фақат сўзлашувимиздаги бир кўриниш, холос. Чунки семантик жиҳатдан улар восита ифодаловчиси эканлиги яқъол англашилиб туради. Масалан: Ўргимни ўраман (П.Қодиров). Улоқчи отdek

манзилга югурди-ю, ер хайдайдиган отек ҳар куни омоч хайдайди (Ў.Хошимов). Менинг ҳам шу болалар билан эгатларга ёнма-ён тушиб олиб, мусобақалашиб, кетмон чопгим келади (Х.Тұхтабоев). Афанди қүш ҳайдаётган эди (Латифалар). Бу гаплардаги **ўрмоқ**, **ҳайдамоқ**, **чопмоқ** феълларининг восита ифодаловчилари ўроқ, омоч, кетмон, қүш сўзлари бўлиб, тушум келишигида келган. Аслида, бу сўзлар касб-хунар маъносини ифодалагани учун ҳам уларга ургу бериш мақсадида тушум келишигида ифодаланган.

Восита ифодаловчиларининг тушум келиши нутқ тежамкорлиги натижасидир. Курол маъносидаги сўз хунарни билдиrsa ёки агенс ифодаловчиси-доимий шуғилланадиган асбоб куролини ифода этса, восита ифодаловчиси тушум келишигида келади. Восита ифодаловчиси, касб-хунардан ташқари турли мақсадларда фойдаланиш мумкин бўлган куролни билдиrsa, у тушум келишигида келмайди. Солиштиринг, ўроғимни ўраман, дейиш мумкин, аммо ҳеч қачон пичогимни кесаман, ё қайчимни кирқаман, дейилмайди.

Демак, хунар маъносини билдирувчи иш-ҳаракатни ифодалайдиган феълларнинг восита ифодаловчиси тушум келишигида келиши мумкин. Бу қуролларни факат шу касб эгаси, яъни ўришда ўроқчи, ер чопишда дехқон ишлатиши мумкин. Энди пичоқ, қайчи каби восита ифодаловчиларига келсак, улардан хунар эгасидан бошқалар ҳам турли мақсадларда фойдаланадилар.

Иккита мисолда восита ифодаловчиси бош келишида келиб, гапда эга вазифасини бажарган. Бу ҳам тилнинг, сўзлашувнинг ўзига хослигидир. Лекин яна семантик жиҳатдан биз уни факат восита ифодаловчиси, деб караймиз. Масалан, Қайси бир йили ҳам кимнингдир бармогини ўроқ киркиб кетган эди (Ў.Умарбеков). Чап бармогининг қорамтири тирноғи (пичоқ ё ўроқ кесиб кетган бўлса керак) чиганоқдек буралиб қолган (Ў.Умарбеков). Бу гаплардаги кирқмоқ, кесмоқ феълларининг восита ифодаловчиси ўроқ, пичоқ сўзлари бўлиб, гапда эга вазифасида келган.

Бу ҳолларда гапдаги эга (субъект) эллипсисга<sup>8</sup> учраб тушиб қолган. Курол маъносидаги ўроқ, пичоқ унинг вазифасини ўз зиммасига олган ва бажарувчи бўлиб қолган. Аслида, мантиқан улар иш-ҳаракатни амалга ошириши асло мумкин эмаслиги, ўроқ ва пичоқни ҳарактга келтирувчи инсон борлиги англашилиб туради. Демак, бу гапларда ўроқ ва пичоқ иш-ҳаракатнинг вужудга

келишидаги қурол бўлиб, **кесмок**, **қирқмоқ** феълларининг восита ифодаловчилариидир.

Восита валентлиги юмуш феълларининг аксарият қисмида шакллантирувчи ҳисобланади. Чунки ҳар сафар уларнинг маъно тузилишидаги 'бирон нарса билан' деган узвига мос сўз талаб килиниб туради ва деярли ҳамма гапларда восита ифодаловчи сўз учрайди. Масалан, кўрпа билан, хартуми билан, пичокда каби.

Восита валентлиги зарурий ва шакллантирувчи бўлган феъллар қуидагилардир: боғламоқ, қоқмоқ, кесмоқ, тўғрамоқ, қайрамоқ, тарамоқ, бўямоқ, ўймоқ, чопмоқ, ўрамоқ, қазимоқ, тикмоқ, қирқмоқ, текисламоқ, ҳайдамоқ, ўлчамоқ, артмоқ, ювмоқ. Эътибор билан қарасак, бу феъллар билдирган иш-ҳаракатни бирон бир қуролсиз бажариб бўлмайди, яъни қўл билан бирон-бир нарсани кесиб бўлмайди, ўлчаш учун ҳам албатта бирорта идиш ёки тарозу керак ва ҳоказо.

Гапда баъзан восита валентлиги ифодаловчиси ўз аксини топмаган бўлиши мумкин. Лекин аввал таъкидланганидек, юмуш феъли маъносидан англашилиб туради. Демак, восита валентлиги бу феълларда зарурий (облигатор) валентлиқидир. Масалан: Оғзини маҳкам чилвир билан боғлаб қўиди (М.Осим). Ҳаммомда ўз ҳанжари билан томирини қирқди (Ў.Умарбеков).

Бу ва бошқа шу каби гапларда юқоридаги фикримиз тасдиқланади. Булардан боғламоқ, қирқмоқ феълларининг восита ифодаловчилари чилвир, ҳанжар сўзларидир.

Мантиқан, ушбу феълларнинг восита валентлиги реализатор, зарурий ҳисобланади.

Демак, восита валентлиги ҳам, объект валентлиги каби, юмуш феълларининг маъно тузилишидаги бир узв билан мослашиб, унинг маъносини очиб беради. Бундан ташқари, восита валентлиги феълда англашилган иш-ҳаракатни тўлдириб, воситасиз шу ҳаракат амалга ошмаслигини англатади. Шу билан восита валентлиги ҳам юмуш феъли маъносининг тўлиқ акс этишини таъминлайди.

## Хулоса

1. Восита валентлиги юмуш феълларининг зарурий валентлигидир.
2. Восита валентлиги ифодаловчилари маъносига кўра иккига бўлинади:
  - 1) восита маъноси; 2) қурол маъноси.

3. Улар гапда **билин күмакчиси** ва ўрин, жұналиш келишиги қўшимчалари орқали реаллашади.
4. Гапда асосан воситали тўлдирувчи вазифасида келади.
5. Юмуш феълларининг восита ифодаловчиси асосан от туркуми орқали ифодаланиб, нарса, курол кабиларни билдириб келади.
6. Юмуш феълининг восита ифодаловчиси гапда равиш ҳоли вазифасида ҳам келади. Бунда восита ифодаловчиси вазифасидаги сўз одатдагидек от туркуми эмас, балки от+лаб қўшимчаси билан ясалган равиш орқали ифодаланади.

## АДРЕСАТ ВАЛЕНТЛИГИ ВА УНИНГ ИФОДАЛАНИШИ

Юмуш феълларининг яна бир валентлиги адресат валентлигидир. Юмуш феълларида ифодаланган иш-ҳаракат шу валентлик актантига йўналган бўлади, яъни адресат ҳаракатни қабул қилувчи ҳисобланади. Адресат ифодаловчилари асосан шахс билдирувчи сўзлар бўлади. Агар шахс ифодаловчи сўз бўлмаса, у кўчма маънода, шахс ўрнида қўлланган сўз бўлади. Йўналиш маъноси жўналиш келишигига ифодаланади, шунинг учун аксарият адресат ифодаловчилари жўналиш келишигига келади.

Адресат валентлиги ифодаловчиларининг маъно тузилиши шундай бир ўзига хоски, бу валентликка ўз-ўзидан эга бўлган, адресат валентлиги зарурий валентликка айланган юмуш феъллари мавжуд, шу билан бирга адресат зарурий бўлмаган, у маълум шартга кўра талаб қилинган, яъни адресат валентлиги факультатив валентлик ҳисобланган феъллар мавжуд.

Юмуш феълларининг кўпчилигига адресат бор ва у фаол иштирок этган. Адресат ифодаловчилари турли сўз туркумига оид бўлиши мумкин. Қандай сўз туркумида бўлмасин, улар, бир нечта истисно мисолларни ҳисобга олмаганда, шахс маъносини англатади: Саида опа ҳаммага чой қуйиб узатди (Ў.Умарбеков).

Холат феълларида ҳам адресат ва адресат валентлигига эга феълнинг агенси (адресант) шахс ифодалайди, яъни агенси шахсни билдирувчи ҳолат феълларигина адресат валентлигига эга бўлади. Умри Умидага ўхшайди (Ҳ.Назир).

Адресат валентлиги от сўз туркуми орқали ифодаланиши мумкин. Бунда у ҳар хил маънони билдириб келади:

1. Шахс билдирувчи турдош отлар. Масалан: Чунки хонга зулм пичоғини қайраб бериш, шу мансабда узок яшамоқнинг асосий шартидир (А.Қодирий). Афанди, худо бандаларига кулоқ улашганда эшак билан баровар борган экансиз-да! (Латифалар). Бу гапларда **қайрамоқ**, **улашмоқ** феълларининг адресат ифодаловчиси **хон**, **банда** сўzlаридир.

2. Қариндош-уруг номлари. Масалан: Гўштни онангга тўғраб бер (А.Қодирий). Майли, ўглим, келинимга мен ундан яхисини ясад бераман (Ў.Умарбеков). Бугапларда **тўғрамоқ**, **ясамоқ** юмуш феълларининг адресат ифодаловчилари она **ва келин** сўzlаридир.

3. Атоқли отлар. Масалан, Мана шу ерга Анвар акангга уй солиб берамиз (А.Қодирий). ...ул нобакор Нуҳ бинни Мансурга қарши

исён байробини кўтариб...(М.Осим). Бу гапларда **солмоқ** ва **кўтармоқ** феълларининг адресат ифодаловчилари **Анвар ака, Нуҳ бинни Мансур** сўзларидир.

Адресат ифодаловчилари яна кишилик олмошлари билан ҳам ифодаланиши мумкин. Масалан, Яхшибой аканинг ўзи сизга чўлдан юз гектар ҳайдаб берарди (Ў.Умарбеков). ..чол унга ўрин солиб берганда ҳам...(А.Қаҳҳор). Бу гапларда **ҳайдамоқ**, **солмоқ** феълларининг адресат ифодаловчилари **сиз ва улар** олмошларидир.

Адресат ифодаловчилари отлашган сўзлар билан ифодаланиши мумкин. Масалан: Калтак ўқталганда тўқмоқ кўтар (Мақол). Бу гапда **кўтармоқ** юмуш феълининг адресат ифодаловчиси **ўқталған** сифатдоши бўлиб, у отлашган сўздир.

Баъзи гапларда адресат мазмундан англашилиб турса-да, гапда ўз ифодасини топмаган, яъни у имплицит бўлади. Уларни ҳам имплицит агенсини келтириб чиқаргандек, шахс-сонни мантиқий ифодалардан аниқлаштириб, кишилик олмошлари орқали ифодаласа бўлади. Масалан: Кейин ўзим яхши кўрган шоколаддан икки-учтасини узатиб, бор, энди бир пас ўйнаб келгин, -дейди (Х.Тўхтабоев). Томдан ўтин ташлаб бергин (Х.Тўхтабоев). Бу гапларда **узатмоқ**, **ташламоқ** юмуш феълларининг адресат ифодаловчилари имплицит, лекин иккала гапда ҳам адресат I шахс, бирликдаги киши маъносини билдиради. Чунки биринчиси гапда ўзим сўзи шоколад кимга узатилганини билдириб турса, иккинчи гапда сўровчининг нутқидаги феъл буйруқ-истак майлида бўлиб, менга ташлаб бергин, деган илтимос англашиляти.

Баъзи гапларда адресат ифодаловчилари инсон мучасини билдирувчи сўз бўлади, яъни улар бутуннинг қисмини ифодалайди. Бунда ҳам иш-ҳаракат шахсга қаратилади, факат умуман шахсга эмас, унинг бирон-бир тана аъзосига йўналтирилган бўлади. Масалан: Графиндаги сувдан боланинг юзига сепди (М.Ҳазраткулов). Тракторчи шу ерга чолни ётқизиб, кўкрагига сув сепаётган эди (Ў.Умарбеков). Шу он Сипарангиз **кўйинидан** кичкинагина ялтироқ пичоқча олди-ю, ўзининг **кўксига** санчиб...(М.Осим). Бу гапларда **сепмоқ**, **санчмоқ** феълларининг адресат ифодаловчиси юз, **кўкрак** ва **кўкс** сўzlари бўлиб, аслида улар боланинг юзи, чолининг **кўкраги**, ўзининг **кўксги** тарзда шахсни билдиради.

Бир неча мисолимизда адресат шахс ифодаламайди, лекин маъносидан шахсга ишора сезилиб туради. Масалан: Мехмонхона

торлик қилганидан мактаб учун маҳсус бино ёпди (А.Қодирий). Бу гапда ёнимоқ юмуш феълининг адресат ифодаловчиси мактаб сўзидир. Лекин бино мактаб талабалари учун курилгани яққол англашилиб туради. Ёки яна бир мисол: Чўл баҳор келинчаги оёғи остига чечаклар билан безанган яшил поёндозини ёйиб ташлади (М.Осим). Бу гапда агенс ҳам, адресат ҳам аллегорик образлардир, яъни автор уларни жонлаштириб, шахс сифатида беради. Ушбу гапда ёнимоқ феълининг адресат ифодаловчиси баҳор келинчаги оёғи сўз биримасидир.

Баъзан адресат ифодаловчилари жамоа, ташкилотни билдирувчи институт, маҳалла каби сўзлар бўлиши мумкин. Ушбу жамоа ёки ташкилот инсонлардан иборат. Демак, адресат ифодаловчиси шахсни билдиради, деган шартимиз яна сакланиб қолди.

Юмуш феълларининг адресат ифодаловчиси, аввал айтилганидек, жўналиш келишигига бўлади. Шу билан бирга улар караб, учун, атаб, қарши кўмакчилари билан ҳам келади. Бунда адресат маъноси кўмакчилар маъноси билан боғлиқ бўлади. Бир-биридан кўмакчи билдирган маънога кўра фарқланади. Шулардан учун, атаб кўмакчилари аталганлик маъносига кўлланар экан, адресат ҳам шундай маъно ифодалаганини кўрамиз. Масалан: Улар учун шундай катта молхона курган эдикки...(Латифалар). Онам менга атаб атайлабдан кулча ясаган (Ў.Хошимов). Бу гапларда курмок, ясамоқ юмуш феълларининг адресат ифодаловчилари улар, мен сўзларидир. Иш-ҳаракат ўтувчи объект ана шу адресат ифодаловчиларига аталганлиги англашилади.

Қарши кўмакчиси қарама-қаршилик маъносига кўлланади. Шунинг учун бу кўмакчи билан келган адресат ифодаловчисида ҳам шу маънони кўрамиз. Масалан: ...ул нобакор Нуҳ бинни Мансурга қарши исён байробини кўтариб, Моваруннаҳр тинчини бузмоқда (М.Осим). Бу гапда қўтармок феълининг адресат ифодаловчиси Нуҳ бинни Мансур бўлиб, иш-ҳаракат ана шу адресат ифодаловчисига қарама-қарши йўналганлиги билдирилади.

Кейинги мисолда ҳам шунга ўхшаш ҳолни кўрамиз. Бу гапда қараб кўмакчиси кўлланган. Лекин қараб кўмакчиси билан келганда қарши кўмакчиси билан келгандаги кескинлик сезилмайди. Масалан: ...ойим кўлидаги таёқни менга қараб отди (Х.Тўхтабоев). Бу мисолда отмоқ феълининг адресат ифодаловчиси томон йўналганлиги билдирилади. Демак, ҳар хил кўмакчилар билан ифодаланганди, адресат ва юмуш феъли орасидаги

муносабатда нозик фаркланиш мавжуд бўлади. Гапда адресат ифодаловчилари доим воситали тўлдирувчи вазифасида келади. Юқоридаги кўрган мисолларимиз фикримизни тасдиқлайди.

Юмуш феълларининг адресат валентлигига эга бўлиш имкониятини кўриб чиққанимизда, куйидаги ҳолнинг гувоҳи бўлдик. **Сузмок**, **солмок**, **ясамок** каби юмуш феълларининг адресат ифодаловчилариiga шу иш-ҳаракат ёки объект аталган бўлади ёки бағишланади. Масалан: Анвар уларга дастурхон ёзиб...(А.Қодирий). Ферузаойга атаб ертўлага атайлаб узум осди (Ҳ.Ғулом). Чунки мулла Фазлиддин чорбоғда Бобур учун кўшк курган...(П.Қодиров). Бу гапларда ёзмоқ, осмок, курмок феълларининг адресат ифодаловчилари биринчи гапда (**улар**) жўналиш келишигига, иккинчи гапда (**Ферузаой**) жўналиш келишигига ва атаб кўмакчиси билан, учинчи гапда (**Бобур**) учун кўмакчиси билан берилган.

**Юкламоқ**, **орқаламоқ**, **термоқ** каби феълларнинг адресат ифодаловчилари аталганлик маъносини бермайди. Уларнинг маъно тузилиши бутунлай бошқача бўлиб, бунда юмуш феъллари билдирган иш-ҳаракат адресат ифодаловчиси ўрнига агенс томонидан бажарилганлиги англашилади, яъни: Улар қизларга пахта териб беришди. Бу гапда термоқ юмуш феълининг адресат ифодаловчиси **қизлар** сўзидир.

Юмуш феълларидан англашилган иш-ҳаракатнинг ўзида адресат зарурияти бор феъллар сезилиб туради. Масалан: овқат сузмок; бунда овқат, албатта, кимгадир сузилади. Адресат валентлиги ушбу феълларда худди ўтимли феълларнинг обьекти каби талаб қилиниб туради. Масалан, сотмоқ феъли. Гилам сотсанг, қўшнингга сот! (Макол). Сотмоқ феълида айнан шундай ҳолатни кўрамиз. Сотиш жараёнинг ўзи адресатсиз содир бўлмайди. Мана шунақа адресат валентлиги зарурий бўлган юмуш феъллари бор ва, аксинча, уларга зарурат бўлмаган юмуш феъллари бор. Адресат валентлиги зарурий бўлмаган феълларнинг баъзиларига **бермоқ** кўмакчи феълини қўшсак, адресат зарурати пайдо бўлади. Бу ҳолда адресат ифодаловчисига зарурат **бермоқ** кўмакчи феъли билан биргаликда англатган маънода мавжуд бўлади. Чунки ушбу кўмакчи феълининг маъно тузилишида адресат валентлигини талаб килувчи узв бор, яъни бермоқ феъли маъносида аталиш маъноси бордир. У юмуш феълига қўшилганлиги туфайли таркибли феъл маъносида адресат валентлиги бор бўлади. Ҳакиқатдан, бундай

гапларни кузатганимизда, адресат валентлиги мавжуд эканлигини күрамиз, аммо гилам сотмоқ сүз бирикмасидаги адресат ифодаловчиси билан ерни чопиб бермоқ сүз бирикмасидаги адресат ифодаловчилари орасида фарқ бор, албатта. Масалан, бермоқ күмакчи феълини сотмоқ феълига құшсак, гилам сотиб бермоқ тарзида бұлади. Унинг адресатини қўйиб кўрайлик: қўшнимга гилам сотиб бердим. Энди иш-харакат ўтувчи объект қўшнимга сотилмади. Қўшнининг гилами менинг ёрдамимда сотилди.

**Ерни чопиб бермоқ** сүз бирикмасида эса объект эмас, иш-харакат адресатга бағишиланади. Ана шу хусусиятларига кўра юмуш феълларини икки гурухга ажратамиз:

1. Адресат ифодаловчиси юмуш феълининг ўз мазмунидан яққол талаб қилинган феъллар.

2. Адресат ифодаловчиси юмуш феъли + бермоқ кўмакчи феъли таркиби феъли мазмунидан талаб қилинган феъллар.

Биринчи гурухга қуйидаги феълларни киритамиз: тикмоқ, узатмоқ, супурмок, сотмоқ, сепмоқ, узмоқ, сузмоқ, куймоқ, ёймоқ, солмоқ, тўқимоқ, ёзмоқ, қурмоқ, ясамоқ, очмоқ, тайёрламоқ. Масалан: Обиджон этигини этаги билан артиб, акасига узатди (А.Қахҳор). Агар шаҳаншоҳ бизга меҳмон бўлиб келса, оёгига қирқ кўчкор сўямиз (М.Осим). Анвар уларга дастурхон ёзиб...(А.Қодирий). Бу гапларда узатмоқ, сўймоқ, ёзмоқ феълларининг адресат ифодаловчилари ака, шаҳаншоҳ, улар сўзларидир.

Иккинчи гурухга қуйидаги феълларни киритамиз: юкламоқ, чоцмоқ, ташламоқ, беламоқ, кўммоқ, ювмоқ, термоқ, экмоқ, судрамоқ, тутмоқ, кулфламоқ, мойламоқ, бузмоқ, қазимоқ, тозаламоқ, ортмоқ, қайрамоқ, ўймоқ, тузатмоқ, сугормоқ, ҳайдамоқ, тортмоқ, кўтартмоқ. Масалан: Чунки хонга зулм пичоини қайраб бериш...(А.Қодирий). Томдан ўтин ташлаб бергин (Ў.Умарбеков). Яхшибой аканинг ўзи сизга чўлдан юз гектар ҳайдаб берарди (Ў.Умарбеков). Бу гапларда қайрамоқ, ташламоқ, ҳайдамоқ юмуш феълларининг адресат ифодаловчилари хон, сиз сўзлари бўлиб, учинчи гапда имплицит /мен/ дир.

## **Хулоса**

1. Адресат валентлиги юмуш феълларининг факультатив валентлигидир.
2. Юмуш феъллари ўз маъносига кўра адресат талаб этувчи ва бермоқ кўмакчи феъли билан таркибли феъл ҳолида адресат талаб қилувчи феълларга бўлинади.
3. Улар гапда жўналиш келишиги ва учун, атаб, қараб, қарши кўмакчилари ёрдамида феъл билан бирикади.
4. Гапда воситали тўлдирувчи вазифасида келади.
5. Юмуш феълларининг адресат актанти, асосан, шахс билдирувчи от, олмош ва отлашган сўзлар билан ифодаланади.

## ЎРИН ВАЛЕНТЛИГИ ВА УНИНГ ИФОДАЛАНИШИ

Юмуш феълларининг маъно тузилиши амалий ҳаракат билан боғлиқ ва бирор нарсага ўтиш хусусиятига эга. Бундай ҳаракат содир этилиши учун, албатта, жой ва макон бўлиши керак бўлади. Юмуш феълининг имкониятларини ўрганар эканмиз, ана шу жой маъносидаги сўзга талаб сезилиб туради. Бу юмуш феълларининг яна бир валентлик, локалис (ўрин) валентлигига эга эканлигини кўрсатади.

Юмуш феълларининг ўрин валентлиги ифодаловчилари катта сатҳдаги жойларни билдирувчи сўзлар бўлиб, юмуш феъллари билдирган ҳаракатнинг амалий хусусиятга эга эканлиги билан боғлиқдир. Масалан: “Правда” колхозининг тоғли ерларида ўт ўрилмай келар эди (Ў.Умарбеков). Янаги йилданоқ далалярнинг барига шу Азизнинг навидан экардим (Ў.Усмонов). Буларнинг зиммаларига тушадиган вазифалар – хумдондан ғишт, Зарбулоқдан кум ташиш (А.Қаҳхор). Бу гапларда ўрмоқ, экмоқ, ташимоқ феълларининг ўрин ифодаловчилари ер, дала, Зарбулоқ сўзларидир. Ўрин ифодаловчилари биринчи гапда ўрин келишигигида, иккинчи гапда жўналиш келишигигида ва учинчи гапда чиқиши келишигигида келган.

Энди ўрин валентлигига эга бўлган ҳолат феълларида ўрин актантининг ифодаланишига эътибор берайлик. Ҳолат феълларининг локалис актанди ҳар доим ўрин келишигигида ифодаланади. Асосан шу келишикдаги нутқ бирлиги феълда ифода топган ситуациянинг бажарилиш ўрин билан бевосита боғланади.<sup>16</sup>

Юмуш феълларида эса ўрин ифодаловчилари ўрин келишигидан ташқари жўналиш ва чиқиши келишикларида ҳам ифодаланиши мумкин. Бу ҳам юмуш феълларининг маъно тузилишидаги амалий ҳаракат, фаоллик билан боғлиқ. Ҳолат феъллари ифодаланган маъно эса жўналиш ёки чиқиши келишигидаги ўрин ифодаловчилари билан муносабатга кириша олмайди.

Ҳолат феълларидаги 'ҳолат' узви бирон жойга ёки бирон жойдан йўналиши мумкин эмас. Ҳолат феъллари билдирган иш-ҳаракат фақат бирон жойда содир бўлиши мумкин. Масалан, гавдаланмоқ ҳолат феъли фақат кўз олдида гавдаланади бўлиши мумкин. Кўз олдига гавдаланади ёки кўз олдидан гавдаланади, тарзида бирикиши асло мумкин эмас. Юмуш феълларидаги 'ҳаракат' узви эса ҳар учала келишик билан бирика олиш имконини

беради. Чунки юмуш феъллари маъносидаги амалий ҳаракат бирон жойга ёки бирон жойдан жўналиши мумкин. Қиёсланг:

Далага экмоқ.  
Далада термоқ.  
Даладан термоқ.

Юмуш феъллари ўрин валентлиги ифодаловчилари билан муносабатга киришар экан, баъзи феъллар чиқиш, баъзилари жўналиш келишиги ёрдамида асло реаллаша олмайди. Масалан, узмоқ, термоқ каби феълларнинг ўрин ифодаловчилари ўрин ёки чиқиш келишигига келмайди. Экмоқ, курмоқ, сепмоқ каби феълларнинг ўрин ифодаловчилари эса ўрин ва жўналиш келишигига бўлиши мумкин, лекин ҳеч қачон чиқиш келишигига реаллашмайди. Бу юмуш феълларининг семантик хусусиятлари билан боғлиқдир.

Термоқ, узмоқ каби феълларда ҳаракат объект ўрнидан бажарувчига қараб йўналган бўлади. Жўналиш келишиги ўрин маъносини билдирганда, йўналиш маъноси бажарувчидан бошланади. Шунинг учун ушбу феъллар билдирган ҳаракатнинг ўрнини жўналиши келишигига ифодалаш мантиқан тўғри келмайди. Юқорида айтганимиздек, бу феълларнинг ўрин ифодаловчилари ўрин ёки чиқиш келишигига ифодаланади. Масалан:...тандирдан гижда узаётган новвойнинг олдида тўхтаб...(Латифалар). “Правда” колхозининг тоғли ерларида ўт ўрилмай келарди (Ў.Умарбеков). Бу гапларда узмоқ ва ўрмоқ феълларининг ўрин ифодаловчилари чиқиш келишигидаги тандир ва ўрин келишигидаги ерлар сўзларидир.

Экмоқ, солмоқ, сепмоқ каби феълларда ҳаракат бажарувчидан объект ўрнига қараб йўналган. Чиқиш келишиги ўрин-жой маъносини билдирганда, йўналиш объект ўрнидан бошланади. Шунинг учун юқоридаги феъллар англатган ҳаракатнинг ўрин ифодаловчилари чиқиш келишигига келиши мантиқан тўғри бўлмайди. Улар ўрин ёки жўналиш келишигига бўлиши мумкин. Масалан ...куёвингиз баҳорда қирга буғдой экиб, кузда сизга от олиб бермоқчи (Латифалар). Чорбоғда тиллакори кўшк курганингизда кўргансиз... (П.Қодиров). Бу гапларда экмоқ, курмоқ феълларининг ўрин ифодаловчилари жўналиш келишигидаги қир ва ўрин келишигидаги чорбоғ сўзларидир.

Ўрин ифодаловчиси қайси келишикда келиши мумкинлигига кўра феълларни куйидаги гурухларга ажратамиз.

1. Ўрин ифодаловчилари ўрин келишигига келиши мумкин бўлган юмуш феъллари: **тиқмоқ**, **сотмоқ**, **соғмоқ**, **сузмоқ**, **куймоқ**, **тўқимоқ**, **ясамоқ**, **очмоқ**, **юкламоқ**, **чопмоқ**, **ювмоқ**, **кулфламоқ**, **қайрамоқ**. Масалан: Зумрадбibi бостиридада сигир соғяпти (Х.Ғулом). Қайнонангиз дарё лабида кир ювиб ўтириб сувга тушиб кетибди (Латифалар). Бу гапларда **соғмоқ**, **ювмоқ** феълларининг ўрин ифодаловчилари ўрин келишигидаги бостирма ва дарё лаби сўзлари.

2. Ўрин ифодаловчилари жўналиш ва ўрин келишигига келган юмуш феъллари: **экмоқ**, **сепмоқ**, **ёймоқ**, **солмоқ**, **ёзмоқ**, **курмоқ**, **ташламоқ**, **беламоқ**, **кўммоқ**, **ортмоқ**. Масалан: Йўлакларга сув сепилган...(А.Кодирий)...бу қўрғонларни ўз шахримга элтиб курмагунимча, менинг суюгим тинчмайди (Ўзбек халқ оғзаки ижоди). Бу гапларда **сепмоқ**, **курмоқ** феълларининг ўрин ифодаловчилари жўналиш келишигидаги **йўлак**, **шахар** сўзлари.

3. Ўрин ифодаловчилари чиқиш ва ўрин келишигига келган юмуш феъллари: **узмоқ**, **термоқ**, **тутмоқ**, **сурмоқ**, **олмоқ**, **ўрмоқ**. Масалан:... ҳар гектар ердан ўн тонналааб тузни сурниб чиқарибмиз (Х.Ғулом). Бир куни афанди ҳовуздан сув олаётуб...(Латифалар). Бу гапларда **сурмоқ** ва **олмоқ** феълларининг ўрин ифодаловчилари чиқиш келишигидаги ер ва ҳовуз сўзлари.

Ҳар бир гуруҳ феълларининг ўрин ифодаловчилари кўрсатилган келишикда бўлиши мумкин ва бошқа келишикда реаллашмайди. Чунки бу уларга мантиқан тўғри келмайди.

Юмуш феълларининг ўрин ифодаловчилари келишиклар билан бирга кўмакчи отлар билан ҳам ифодаланиши мумкин. “Кўмакчили нутқ бирликларида ҳолат (ҳаракат ҳам) юз берган сатҳ анча аниқлашиб туради”. Бунда ўрин актантлари конкрет бир жой маъносини ифодалайди.

Улар от + кўмакчи кўринишида бўлар экан, ўша отга нисбатан қаерда, қай ҳолатда эканлиги жуда аниқ кўрсатилади. Масалан:...така мўйловли эса уй ичидаги майдага мих билан деворга сим қоқарди (Ў.Усмонов). Кейин бу тахталар устига беда боғларини баланд қилиб тахлаб ташлади (П.Кодиров). Болалар, мана бу кўча бошида ёнғоқ қоқиляпти (Латифалар). Бу гапларда **коқмоқ**, **тахламоқ**, **коқмоқ** феълларининг ўрин ифодаловчилари уй ичидаги, тахталар устига, кўча бошида каби сўз бирикмалари. Улар ичидаги, устига, бошида кўмакчи отлари орқали

иш-харакатнинг ўрин маъносини умумийликдан хусусийликка айлантирган, янада аникроқ ифодалашга ёрдам берган.

Юмуш феъллари амалий харакатларни ифодалайди. Уларнинг кўпчилиги инсоннинг кундалик шуғулланадиган иш-харакати бўлиб, аксарият, ҳовли-жойга тааллукли ўрин ифодаловчиларига эга бўлади: ўчоқбоши, сўри, том, ошхона, бостирма, ҳовли, кўшк, ертўла, айвон каби. Масалан: Ҳадича хола супага ҳизил шолча ва янги атлас кўрпача солди (А.Қахҳор). Ҳанифа ўчоқбошида ош дамлар, Чўлбобо ҳамон боғда ишлар эди (Х.Ғулом). Афанди уйдан бир ҳамён тангани кўтариб чиқиб...(Латифалар). Маҳаллардан беш-ўнта бола йигди ва енг шимариб, мактабдорликни бошлади (А.Қодирий). Бу гапларда солмоқ, дамламоқ, соғмоқ, кўтармоқ, йигмоқ феълларининг ўрин ифодаловчилари одамлар яшаб, кун кўрадиган жой маъносидаги куйидаги сўзлардир: супа, ўчоқбоши, бостирма, уй, маҳалла.

Баъзи ўрин ифодаловчилари эса кишиларнинг меҳнат фаолияти билан боғлик бўлган жойлар бўлиб, улар куйидагилардир: ишхона, ферма, тегирмон, мактаб, вокзал, бозор, күшхона ва ҳокозо. Масалан: Ойим бўлса уйимиздан уч юз метр наридаги фермада сигир соғади (Х.Тўхтабоев). Қозон вокзалида Мирзачўлга кетаётганларининг маҳсус вагони составга уланди (Х.Ғулом). Бир куни отаси билан эшакка ун юклаб тегирмонга кетаётган эди (Латифалар). Бу гапларда соғмоқ, уламоқ, юкламоқ феълларининг ўрин ифодаловчилари касб-хунар билан боғлиқ жойни билдирувчи ферма, вокзал, тегирмон сўзларидир.

Йигилган мисолларда энг кўп учрайдиган ўрин ифодаловчиси-бу 'ер' узвига эга бўлган сўзлардир. Куйидаги сўзлар шулар жумласидандир: чўл, чукур, ер, боғ, қир, дала, Мирзачўл, жой, тоғ ва ҳоказо.

Масалан: Сиддиқжон далага уруғлик ва гўнг элтиб, ҳосил келтиради (А.Қахҳор). Чўлда янги ерлар очяпмиз (Х.Ғулом). Ҳар гектар ердан тонналаб тузни суриб чиқарибмиз (Х.Ғулом). Бу гапларда элтмоқ, очмоқ, сурмоқ феълларининг ўрин ифодаловчилари дала, чўл, ер сўзларидир.

Юмуш феълларининг ўрин валентлиги сув ҳавзлари билан боғлиқ сўзлар орқали ифодаланиши мумкин. Масалан:...шўрни зовурга ағдарамиз (Х.Ғулом). Бир куни Афанди ҳовуздан сув олаётиб, кўзасини сувга тушириб юборди (Латифалар).

...Сиддиқжон анҳорнинг нариги ёғида анжир очаётган бўлиб, қизни кузатиб турган эди (А.Қаҳхор). Бу гаплардаги ағдармоқ, олмок, очмоқ феълларининг ўрин ифодаловчилари сув ҳавзасини билдирувчи зовур, ҳовуз сўзлари ва анҳорнинг нариги ёғи сўз бирикмасидан иборат.

Баъзи гапларда ўрин валентлиги ўрин равиши орқали ифодаланган. Бунд ўрин-жой маъноси от орқали ифодаланганга қараганда мавҳумроқ бўлади. Масалан: Товоқни нари сурдим (Ў.Хошимов). Душманни орқага сурба бошладилар (М.Осим). Узоқ-яқиндан мол боқишига келган болалар шу ерда йигилиб... (Ў.Хошимов). Бу гапларда сурмоқ, боқмоқ феълларининг ўрин ифодаловчилари нари, орқа, узоқ-яқин равишилари бўлиб, улар турли келишикларда келган.

Юмуш феълларининг барча валентликларида бўлгандек, ўрин валентлигига ҳам шу актант олмош орқали ифодаланган мисоллар учради. Уларда маълум ўрин-жойга ишора берилади. Табиийки, бунда ўрин маъноси мавҳум ифодаланади. Масалан: баъзи жойларга тўрт-беш мартараб чигит экишиди азаматлар (Ў.Усмонов).

Мана шу ерга Анвар Акангга уй солиб берамиз. (А.Қодирий)

Бу гапларда экмоқ, солмоқ феълларининг ўрин ифодаловчилари баъзи жой, мана шу ер олмошлариdir.

Юкорида таҳлил килган мисолларимизда ўрин ифодаловчилари вазифасида 'жой' ва 'сатҳ' маъносини билдирувчи ёки унга ишора қилувчи сўзлар келган. Шу билан бирга 'нарса' узвли сўзлар ҳам ўрин валентлиги ифодаловчиси бўлиши мумкин. Улар ўрин, жўналиш ва чиқиш келишигига келиб, ўрин-жой маъносини ифодалайди. 'Нарса' узвли ўрин ифодаловчилари куйидагилардир: ўрик, шоҳ, қўйин, қўра, бешик, тандир, ёқа каби. Масалан: Тушган чўғларни кўрага терди (Х.Ғулом). Анвар оғаларининг бир эски бешигига тўққизинчи кун беланди эмас, тиқилди (А.Қодирий). ...тандирдан гижда нон узаётган новвойнинг олдида тўхтаб.. (Латифалар). Бу гапларда термоқ, беламоқ, узмоқ феълларининг ўрин ифодаловчилари жўналиш келишигидаги қўра ва бешик ҳамда чиқиш келишигидаги тандир сўзларидир. Турли келишикларда ифодаланар экан, бу сўзлар иш-харакат амалга оширилаётган жой маъносини билдиради.

Хуллас, юмуш феълларининг ўрин валентлиги ўрин, чиқиш ва жўналиш келишиклари орқали ифодаланади. Баъзан от кўмакчилар

ёрдамида реаллашади ва бу ўрин маъносини янада аниқроқ ифодалашга хизмат қиласди.

Ўрин валентлиги 'сатх', 'уй-жой', 'корхона', 'ер', 'сув ҳавзаси' каби ўрин-жой маъносидаги узвлари бўлган сўзлар билан ифодаланади. Баъзан эса 'нарса' узвли сўзлар ҳам ўрин, жўналиш ва чиқиш келишикларида келиб ўрин-жой маъносини билдириши мумкин.

Ўрин валентлиги от, равиш ва олмош сўз туркумлари орқали ифодаланади.

## **УМУМИЙ ХУЛОСА**

Юмуш феълларининг валентлигини тадқиқ этиш натижалари куйидаги хуласаларга олиб келади:

1. Юмуш феъллари агенс, контрагент, объект, пациентс, восита, адресат ва ўрин валентликларига эга эканлиги билан характерланади.

2. Юмуш феълларининг агенс валентлиги асосан шахс билдирувчи от, олмош, сифат, сон, равиш каби туркумга оид сўзларда: агар шахс билдирмаса ҳам, мажозий маънога эга бўлган, моҳиятида 'шахс' узви ётган отларда юзага чиқади. Сифат, сон, равиш туркумидаги сўзлар эса отлашган ҳолда учрайди.

3. Юмуш феъллари гапда кесим бўлиб келса, агенс эга вазифасини бажаради. Агар у мажхул нисбатда ёки сифатдош, ҳаракат номи, равишдош вазифаси шаклида кўлланса, уни юзага чиқарувчи сўз гапда бошқа вазифада келиши кузатилади.

4. Юмуш феълларининг контрагенти доимо шахс билдириши, қайси туркумда ифодаланиши жиҳатидан агенсга ўхшаб кетади. Лекин гапда қандай вазифадаги бўлакда юзага чиқиши билан фарқ қиласди. У деярли доим воситали тўлдирувчи вазифасида келади.

5. Юмуш феълларининг контрагент валентлиги облигатор бўлмай, факультатив характерга эга. У жуда кам холларда нутқда юзага чиқади.

6. Юмуш феълларининг объект валентлиги буюм ва шахс билдирувчи от, сифат, сон, олмош туркумига оид сўзларда юзага чиқади. Юмуш феъллари гапда кесим бўлиб келса, объект деярли воситасиз тўлдирувчи вазифасида, юмуш феъллари мажхул нисбатда бўлса, объект эга вазифасида ҳам келиши мумкин.

7. Юмуш феъллари ҳаракат номи ва сифатдош вазифаси шаклларида кўлланса, объект актенти гапда бошқа вазифаларда ҳам кузатилади. Объект валентлиги облигатор валентликдир.

8. Юмуш феълларининг пациентс валентлиги деярли доим воситасиз тўлдирувчи вазифасида юзага чиқиб, от, сифат, сон, олмош туркумлари билан ифодаланиши кузатилади. Феъл мажхул нисбатда ёки ҳаракат номи ва сифатдошлик вазифаси шаклларида кўлланганда, пациентснинг ҳам гапдаги вазифаси ўзгариб кетади.

9. Юмуш феълларининг агент, контрагент, объект, пациентс октантларигина феълнинг нисбати ва қайси вазифа шаклида кўлланганига қараб гапдаги вазифасини ўзgartиради. Бу ҳол феълнинг маълум шаклда кўлланиши шу феълнинг валентликлари билан, валентликлари эса унинг бирон шаклда юзага чиққан маъноси билан боғлиқ бўлишини кўрсатади.

10. Восита валентлиги маъносига кўра восита ва куролни билдиради. Гапда воситали тўлдирувчи вазифасида келади. Восита октанти асосан от туркумида ифодаланиб, нарса, куролни билдиради. У феъл томонидан билан кўмакчиси ва ўрин, жўналиш келишиги ёрдамида бошқарилади.

11. Восита октанти феълнинг қанақа шаклда келишидан қатъий назар ҳоким бўлагига нисбатан гапнинг қандай бўлагида ифодаланиши ўзгаришсиз қолаверади.

12. Адресат валентлиги юмуш феълларининг факультатив валентлигидир. Юмуш феъллари ўз ҳолида адресат талаб этувчи ва бермоқ кўмакчи феъли билан таркибли феъл ҳолида адресат талаб қилувчи феълларга бўлинади. Улар гапда воситали тўлдирувчи вазифасида келади. Улар от, олмош ва отлашган сўзлар билан ифодаланади.

13. Юмуш феълларининг ўрин валентлиги факультатив валентликдир. У ўрин жўналиш, чиқиш келишиклари от кўмакчилар ёрдамида реаллашади. Ўрин ифодаловчилари от, равиш ва олмош сўз туркumlари орқали ифодаланади.

14. Юмуш феълларининг қайд этилган агент, контрагент, объект, пациентс, восита, адресат ва ўрин валентликлари унинг семантикаси билан боғлиқ ҳолда мавжуддир. Шунинг учун ҳам унинг семантик валентликлари деб қаралади.

15. Юмуш феълларининг агент, объект, пациентс ва восита валентликлари зарурий валентлик ҳисобланади.

16. Юмуш феълларининг кўрсатилган семантик валентликлари унинг семантик тузилиши билан боғлиқдир, шунинг учун ҳам у барча тилларда бирдай намоён бўлади, яъни байналмилал характеристерга эга.

17. Юқорида қайд этилган юмуш феъллари семантик валентликларининг гапда қандай шаклда намоён бўлиши ҳар бир тилнинг ўзига хос бўлиб, ушбу ишда муаллиф факат ўзбек тилига хос томонларини тадқиқ этиб кўрсатган. Шунинг учун у миллий характеристерга эга.

## ФОЙДАЛАНИЛГАН АДАБИЁТЛАР РЎЙХАТИ

1. Абдурахмонов И. Полисемия и антонимия прилагательных протяженности в современном узбекском литературном языке. Автореф. дис... канд. филол. наук.-Ташкент. 1973.
2. Абилона Н.С. Вид глагола и семантика глагольного слова.-М : Наука. 1976.
3. Апресян Ю.Д. Лексическая семантика. Синонимические сёдства языка.М.: Наука, 1974.
4. Гак В.Г. Сопоставительная лексикология.-М.: Между-нар. отношения, 1977.
5. Каримжонова В. Лексемаларнинг бошқарув боғланишида юза ифода этувчи классема // Ўзбек тили ва адабиёти.-1993, № 3.-Б.
6. Кононов А.Н.Грамматика современного узбекского литературного языка.-М.-Л.: ИАН, 1960.
7. Кучкартаев И. Валентный анализ глаголов речи в узбекском языке. Ташкент: Ўқитувчи, 1977.
8. Махмудов Н. Эллипсис в узбекском языке: Автореф. дис. канд. филол. наук.- Ташкент, 1978.
9. Махмуд Кошгари. Девону лугатит турк. -Тошкент: ЎзССР Фанлар Акад. Напр., 1960.
10. Махмудов Н. Ўзбек тилидаги содда гапларда семантик-синтаксик асимметрия.-Тошкент: Ўқитувчи, 1984.
  11. Медникова Э.М. Значение слова и его описание. -М:Выш. Шк., 1974.
  12. Миртохиев М. Мажхул нисбат масаласи // Ўзбек тили ва адабиёти. - 1975.-№ 2. -Б.
  13. Миртохиев М. Ўтимлилик ва орттирма нисбат категорияси // Ўзбек тили ва адабиёти. - 1982. -№ 4.
  14. Миртохиев М. Ўтимлилик ва орттирма нисбат категорияси // Ўзбек тили ва адабиёти. - 1983 -№ 2 .
  15. Нигматов Х.Г. Залоги глагола в восточнетюркских языках XI-XII веков // Сов. Тюркология. - 1973, - № I.
  16. Расулов Р. Ўзбек адабий тилидаги ҳолат феъллари ва уларнинг облигатор валентниклари. - Тошкент: Фан, 1989.
  17. Расулов И. Ҳозярги ўзбек адабий тилида бир составли гаплар. - Тошкент: Фан, 1974.
  18. Раҳматуллаев Ш. Лексема ва фразема маъносини компонент таҳдилнинг бальзи натижалари // Ўзбек тили ва адабиёти. - 1972. - № 3.
  19. Раҳматуллаев Ш., Юнусов Р. Семаларнинг семалар состави ва семантик боғланиш масаласи // Ўзбек тили ва адабиёти. - 1974. - № I.
  20. Садыкова М. Слова обозначенные цвет и окраску в узбекском языке: Афореф. дис. ... канд. филол. наук.-Ташкент, 1963.
  21. Солицев В.М. Язык как системно-структурное образование. -М.: Наука, 1971.
  22. Соссюр Ф. Курс общей лингвистики. - М.: 1933.
  23. Степанова М.Д., Хельбиг Г. Чести речи и проблема валентности в современном немецком языке. - М.: Выш. Шк., 1978.
  24. Турсунов У., Мухторов Ж. Ўзбек тилида феъл даражалари тўғрисида // ТР. УзГУ. Нов. Сер. - № 63.
  25. Усмонов С. Умумий тилишунослик. - Тошкент: Ўқитувчи, 1972.
  26. Шукуров И.Эллипсис сабабли отларда нуткий мето-нимиялар содир бўлиши // Ўзбек тили ва адабиёти. - 1982. - № 3.
  27. Юнусов Р. Полисемия и синонимия имён существительных места в современном узбекском лит. языке: Автореф. дис. ....канд. филол. наук.-Ташкент, 1973.
  28. Гуломов А., Аскарова М. Ҳозирги замон ўзбек тили. Синтаксис.-Ташкент: Ўрта ва олий мактаб, 1961.
  29. Ҳакимов Қ.М. Содда гап колипли фразеологизмларда семантик валентниклар: Филол. фанлари номзоди... дис. автореф. - Ташкент, 1994.
  30. Ҳожиев А. Ўзбек тилида кўмакчи феъллар.-Ташкент: Фан, 1966.

## МУНДАРИЖА

Сўз боши.....	3
Юмуш феълларининг агент валентлиги ва унинг ифодаланиши.....	8
Юмуш феъли турли нисбатларда келганда агенснинг гапдаги вазифаси.....	14
Юмуш феъллари функционал формаларда келганда агенснинг гапдаги вазифаси.....	18
Юмуш феълларида объект валентлиги.....	25
Объект ифодаловчисининг турли келишикларда келиши.....	36
Юмуш феъллари функционал формаларда келганда объект ифодаловчисининг вазифалари.....	38
Юмуш феъллари турли нисбатларда келганда объект ифодаловчисининг гапдаги вазифаси.....	41
Юмуш феълларида пациент.....	43
Восита валентлиги ва унинг ифодаланиши.....	46
Адресат валентлиги ва унинг ифодаланиши.....	56
Ўрин валентлиги ва унинг ифодаланиши.....	62
Умумий хулоса.....	68
Фойдаланилган адабиётлар рўйхати.....	70

**Ў. ШАРИПОВА**

# **ЮМУШ ФЕЪЛЛАРИНИНГ МАЪНО ВАЛЕНТЛИКЛАРИ**

**(Ўкув қўлланма)**

**Босишига руҳсат этилди 03.02.2012 йил. Бичими 60x84 <sup>1/16</sup>.**

**«Times Uz» гарнитураси. Офсет усулида босилди.**

**Шартли босма табори 4,75. Нашр босма табори 4,5.**

**Тиражи 100. Буюртма № 194.**

**«Fan va texnologiyalar Markazining bosmaxonasi» да чоп этилди.  
100066, Тошкент шаҳри, Олмазор кўчаси, 171-уй.**